

**NINTH MIZORAM LEGISLATIVE ASSEMBLY
(FOURTH SESSION CUM BUDGET SESSION)**

LIST OF BUSINESS

FOR FOURTH SITTING ON TUESDAY, THE 4th MARCH, 2025
(Time 10:30 A.M to 1:00 P.M. and 2:00 P.M. to 4:00 P.M.)

PRESENTATION OF BUDGET

1. **PU LALDUHOMA**, Hon. Chief Minister to present to the House :
 - i) The Annual Budget for the year 2025-2026 with allied papers.
 - ii) Supplementary Demand for Grants for the year 2024-2025.

LEGISLATIVE BUSINESS

Bills for introduction, consideration and passing

2. **DR. VANLALTHLANA**, Minister to beg leave of the House to introduce
“The Mizoram State University Bill, 2025.”

ALSO

to introduce the Bill

to move that the Bill be taken into consideration

AND

to move that the Bill be passed.

3. **DR. VANLALTHLANA**, Minister to beg leave of the House to introduce
“The Mizoram Exhibition of Films on Television Screen through Video
Cassette Players (Repeal) Bill, 2025.”

ALSO

to introduce the Bill

to move that the Bill be taken into consideration

AND

to move that the Bill be passed.

VANLALTHANTLINGI
Commissioner & Secretary

SPEAKER : *Tuman tu sual pawh suala thungrul lo turin fimkhur rawh u; in thil intihsak tawwna lamah leh, mi zawng zawng chung a in tihsakna lamah pawh, a tha apiang um fo zawk rawh u.*

- I Thessalonika 5: 15

Aw le, vawiina kan business turte chu: - Kan Chief Minister zahawm tak, Finance changtu ni bawkin, heng: -

- 1) The Annual Budget for the Year 2025-26 (with allied papers);
- 2) Supplementary Demand for Grants for the year 2024-2025; leh

Tin, Dr. Vanlalhlana, Minister zahawm tak hnen atangin Legislative Business pahnih:

- 1) The Mizoram State University Bill, 2025;
- 2) The Mizoram Exhibition of Films on Television Screen through Video Cassette Players (Repeal) Bill, 2025.

Kan sawiho ang a, pass nghal kan tum dawn a ni.

Tunah chuan, kan Chief Minister zahawm tak, Finance changtu Pu Lalduhoma'n heng 'The Annual Budget for the Year 2025-26 (with allied papers)' leh, 'Supplementary Demand for Grants for the year 2024-2025' te House-a pharh turin i lo sawm ang.

PRESENTATION OF BUDGET

PU LALDUHOMA, CHIEF MINISTER: Pu Speaker, ka lawm e.

I remtihna in vawiina hian kum 2025-26 chhunga kan Budget ruahmanna karawn pharh a ni.

INTRODUCTION

1. India ram hian hmasawna kawngah ke pen mekin, khawvel huap pawha ram hmasawn chak berte zinga mi a ni mek a. India Sawrkar-in hmasawna kawng atana a vision, Viksit Bharat (Developed India) and Viksit Mizoram (Developed Mizoram) te atangkai thei ang bera lo hmang ve turin kan inbuatsaih mek a ni.

2. Pu Speaker, i hriat angin kan State chuan hun kalta-ahte khan ei bar zawna leh sum lakluhna kawngah harsatna kan tawh thin a. Harsa tak chung a kan revenue lak luh ve ang angte pawh Sawrkar leiba leh loh theih loha hman tulna atan thahnem tak a kal ral a, hei hian sum leh pai enkawlna kawngah min tithuanawp hle a ni.

3. Pu Speaker, tun Inthlanpui hnuhnung berah khan mipuite'n kan chungah rinna an ngat a. Anni min thlawpna azarah Mizoram Legislative Assembly Vawi 9-na pawhin a kum hmasa ber a lo khar ve dawn ta reng mai a. He House zahawm taka Budget hmasa ber ka pharh laia ka sawi tawh ang khan, kum 2024-25 hi chu State Sawrkarin sum leh pai enkawlna kawnga lei rem rap tura a inbuatsaihna atan Year of Consolidation-ah kan puang kha a ni a. He kumpuan atanga kan hmalakna leh a nghawng chhuahte han tarlan ka duh bawh a ni.

4. Kan Sawrkar chuan mipuite tana tha ber tur ngaihtuah chungin, he insiamrem kum denchhen hian kan sum neih ang angte ren tak leh awmze nei taka pe chhuakin, Public Accounts hnuiaia kan sum pek chhuah hmabak, K.Deposit te, Deposit-III te, GP Fund leh

Pension fund te chu a tahtawlin a pe chhuak zel a. Kum 2024-25 chhung hian K. Deposit leh Deposit-III hnuai sum tling khawm Cheng Vbc 837.87 zet te, GPF pek chhuah mai theih loh Cheng Vbc 785.90 leh Pension Benefit tangkhaw Cheng Vbc 1042.42 zet chu kan pe chhuak a ni.

5. Pu Speaker, kan Sawrkar chuan K. Deposit hnuai hun rei tak, kum thum leh a aia rei khawih chet lohva lo mu tawh Cheng Vbc 60.19 zet chu lapsed deposit tiin a puang a. Hei hian Public Account chnuai leiba nasa takin a tihnam a, chu mai bakah kan fiscal deficit leh outstanding liability chhûtna kawngah pawh nghawng tha tak a nei dawn a ni.

6. Power sector lama kan hmasawna pawh hi thil chhinchhiah tlak tak a ni. Power leina kawnga rei tak a bâthlaa kal thin kha, kan leibat tihnam turin tan kan la a. Power leina atana kan leibat kan tlak fel bakah, a hun taka power leina bill kan pek nghal zel tak avangin, kum hmasa lama surcharge kan pek thin chu Cheng Nuai 300 zetin a lo tlahniam thei ta a, hei mai bakah hian, a hun taka kan pek avanga a man min tihniamsakna (rebate) pawh Cheng Nuai 165.69 zet a tling a ni. Hei vang hian power hman bang hralhna lamah harsatna kan neih tak loh avangin, kum kal ta 2023-24 aiin 2024-25 February thla thlenga Power hralhna Atanga revenue kan hmuh pawh Cheng Nuai 783.53 laiin a tam zawk baw a ni. Hei hian Power sector lama kan hmasawna mai ni lo, Sawrkar sum enkawlna kawnga hmasawna leh mawhphurhna kan hlen chhuah dan a tar lang baw a ni.

7. Pu Speaker, National Social Assistance hnuai programme pawimawh tak pathum – Indira Gandhi National Old Age Pension Scheme (IGNOAPS) te, Indira Gandhi National Widow Pension Scheme (IGNWPS) te leh Indira Gandhi National Disability Pension Scheme (IGNDPS) ah te hian Central Sawrkar atanga an dawn thin baka State Sawrkarin thla tin Cheng 100 a lo pek yhin chu kum 2024-25 atang khan Cheng 1000 ah tihsan a lo ni ta a. Tichuan, IGNOAPS hnuai kum 60 atanga 79 inkar thla khata Cheng 300 lo dawng thinte chuan Cheng 1200 an dawng thei ta a, kum 80 leh a chung lam thla khata Cheng 600 la thinte chuan Cheng 1500 an dawng ta baw a ni. Chutiang bawkin, IGNWPS leh IGNDPS hnuai thla khata Cheng 400 la thinte pawhin State Contribution a lo pun tak avangin Cheng 1300 an lo la thei ta a ni. Hei hian kum upa lam te, hmeithaite leh pianphunga rualbanlote Sawrkarin kan ngaih pawimawhzia a tilang a ni.

8. Kuminah hian, Mizoram Health Care Scheme hnuai healthcare bill ba tling khawm zinga 80% chu kan pe tla tih ka han tar lang duh a. Hei bakah hian, tun Sawrkar kum tawpah hi chuan healthcare bill ba zawng zawng chu pek tlak vek theih kan inbeisei baw a ni. Tin, Mizoram Sawrkar chuan Mizoram Universal Healthcare Scheme hnuai ah inenkawlna changtlung zawk *cashless system* keng tel a buatsaih a, heihi April ni 1, 2025 atanga hman tum a ni.

9. Kan Sawrkar chuan Public Distribution System hnuai National Food Security Act (NFSA) in a huam ve loh chhungkuate tan buhfai man chu Kg 1-ah Cheng 15 atangin Cheng 30-ah kan tisang a. Hei vang hian October 2024 leh February 2025, thla nga chhung hian Cheng Vbc 20 lai kan hum thei ta a. Kutzungpui nem (e-POS) chu March 2024 atangin hman tan a ni a. Retailer-te buhfai hralh bang chu hralh phal a nih tak loh avangin

thla 12 kal ta chhung khan buhfai Quintal 46,000 zet hum a ni a. Ration Card surrender chhungkua 212 an awm tawh bawk.

10. Pu Speaker, kan Sawrkar chuan tax reforms lamah tan lain, Septermber 3, 2024 atang khan Petroleum product pahnih, Motor Spirit (MS) leh High Speed Diesel (HSD) atangin Road Maintenance Cess leh Social Infrastructure and Service Cess te a la a. Heng Cess pahnih atan hian litre 1-ah Cheng 2 ve ve lak a ni. Heng Cess pahnihte hi tax revenue tihsanna tura hmalakna niin, hemi atang hian kum 2024-25 chhung hian Cheng Vbc 15 ve ve vel hmuh theih beisei a ni. Heng Cess atanga sum hmuhte hi a hmanna tur ruahman bik atan chauh hman an ni ang a, thil dang a hman pen kan remti dawn lo a ni.

11. Tun kum kalta chhung khan, administrative reform kawnga kan hmalakna chhinchhiah tlak tak pakhat chu Sawrkar Pisa hrang hranga *Kai App* kan hmang thar hi a ni a. Hemi avang hian Sawrkar hnathawkte zingah a hun taka Pisa thlen mai ni lo, hnathawh hun chhung hman dik kawngah te, discipline vawn kawngah leh thawhhona boruak tha siam kawngah hma kan sawn phah hlein kan hria a. Heng avanga kan hlawknate hi a sum leh pai zawng chuan chhut chhuah harsa mahse, hnathawktute chet vel dan leh rilru put hmang chu a siam tha tih loh rual a ni lo. He reform hi Sawrkarin khua leh tuite tana hmasawna hna a thawhna kawngah rahbi pawimawh tak pakhat niin kan ngai a ni.

12. Tunlai technology lama hmasawnnain a ken tel harsatna lian tak, Cybercrime te, social media hmansualna te, dawt leh thu puarpawng thehdarh chingte beih letna kawngah te, dap chhuah leh hremna pek kawngah te theih tawp kan chhuah a. Cybercrime Police Station chuan social media hmangtute tan zirtirna leh kaihhruaina tha an theh darh reng a. Hei hi cybercrime beih letna leh, internet leh technology te him zawka kan hman theihna tura hmalakna pawimawh tak a ni.

13. Kan Sawrkar chuan mipuite nunphung leh khawsak chawikanna atan Handholding Scheme kan kalpui a. Mipuite huap zo, ei-bar zawna kawnga progress partner-te nena tanghoa kan ram mipuite harsatna sutkianna hmanraw pawimawh tak a ni. Nikum kum tawp lama Mizoram Agriculture Marketing Board-a Cheng Vbc 110.00 kan pek chu Sawrkarin a thlan bik thlai thar, i.e., hmunphiah, sawhthing, aieng, Mizo hmarcha leh Mizo thar buhhum lei nan hman chhoh tan mek a ni a, a tul angin sum pawh dah belh zel a ni ang.

14. Handholding Scheme hnuai hmalak mekna thlai panga te bakah hian, Sericulture Department hnuai Silk Samagra-2 lama hmalakna turin ram acre 1300 zet chu sericulture food plant atan siam belh a ni a. Kumin chhung hian Cocoon hi Metric Ton 612.27 zet thar chhuah a ni. Heng cocoon thar chhuahte hi a hralhna tur ruahmanna fel tak awm sa a nih bakah a man pawh January ni 1, 2025 atang khan kum hmasa aiin 16% laiin a pung chho bawk a ni. Hei bakah hian, Cocoon Metric Ton 17.97 zet chu State pawnah 6 thawn chhuah a ni a, hei hi pangang khawia eizawna kawngah hmasawna pawimawh tak a ni.

15. Pu Speaker, kumin chhungin SASCI hnuai Cheng Vbc 500 kan inbeisei laiin, atir lamah Cheng Vbc 275 chauh min approved sak a ni. Amaherawhchu, incentive dawn theihna atana tihhlawhtlin ngaite theih tawpin kan han bawhzui a, SASCI Part V hnuai Stimulation of Industrial Growth hnuai, Mizoram Urban Area Building (Amendment) Regulation 2025 kan implement theih avangin Cheng Vbc 300 zet min pe a. Tin, SASCI Part VII-A hnuai thingtlang lam tihhmasawna tur Incentives for Land Related Reforms

by State Government atan Cheng Vbc 15.18 pek kan ni bawk a. Chu mai a la ni lo a, Part IX hnuiaia CSS hrang hranga SMS atana Cheng Vbc 75 min pawm sak a, Part X hnuiaia District hrang hranga Working Women’s Hostel sakna tur Cheng Vbc 127 nen, a vaia kum kal mek chhunga SASCI atana January 2025 thla thlenga min pawmsak zawng zawng hi Cheng Vbc 792.18 niin, a taka kan sum dawn tawh chu Cheng Vbc 630 a ni. Tin, SASCI Part-I Revised Guidelines hnuiaiah Cyclone Remal, 2024 avanga chhiatna kan tawhte phuhrûkna atan kan State chuan special disaster fund atangin Cheng Vbc 137.50 kan dawng thei dawn a. Heng bakah hian Revised guidelines hnuiaiah Part XIII leh Part I (additional) te la beisei a ni bawk. SASCI Part I hi State zawng zawngin kan dawng a, Part dangte hi chu State tinin an dawng kim vek lo fo va. Keini erawh chuan kan dawng kim thei deuh thaw hi kan Official-te thahnemngaihna a ni a, a lawmawm hle a ni.

Pu Speaker, tuna ka sawi bakah hian hemi ka speech tur buatsaih hnuah hian dawn belh leh kan nei nual a, India rama State 3 (pathum) chauhin an dawn theih te, State 5 (panga) chauhin an dawn theih te pawh dawn leh kan nei tawh a ni.

OVERVIEW OF THE STATE’S ECONOMY

16. Pu Speaker, kan State economy hmelmang tlangpui hi heng tehfung hrang hrang atana an hman, GSDP, revenue deficit, fiscal deficit leh debt sustainability te hmang hian tarlan ka han tum dawn a ni.

17. Kumin 2024-25 GSDP (BE) hi Cheng Vbc 48037.52 ni tura chhût a ni a, figure awm sa beh chhana siam a ni lo thei lo a. Kan Sawrkar chuan kan nihna dik tak aia sang GSDP figure kan nei thin hi tha a ti lo a. Tlahniam ta angina lan phah dawn mah ila, tun atang chuan huaisen taka figure dik thei ang ber hmanga inteh a, kan nihna dik tak pho chhuah ngam hi a duh tlat avangin 2024-25 GSDP (RE) Cheng Vbc 48037.52 chu Vbc 34003.27 ni zawk tura chhût chhuah a ni ta a, a hniamna hi Vbc 14034.25 zet a ni. Hei hi figure dik zawk kan hman tak vang mai a ni a, tlahniam angina figure-ah lang mah se, a takin kan thang lo tihna a kaw lo. Nakum 2025-26 GSDP (BE) chu Cheng Vbc 36088.82 ni tura chhût niin, a punna chu Vbc 2085.55 a ni chho leh dawn tho a ni. Chutiang bawkin kan economy than chhoh dan pawh hetiang hian siam that a ni:-

- 2021-22 (Actuals at constant price) - 9.30%
- 2022-23 (Provisional) - 9.74%
- 2023-24 (Advanced Projection) - 9.89%
- 2024-25 (Projection) - 10.05%
- 2025-26 (Projection) - 10.21%

18. Kum 2025-26 chhunga kan State’s Own Revenue hi kan Total Revenue Receipt atangin 20.20% tling thei tura chhût a ni a, sum hmuh tur zawng zawng, Consolidated Receipt atanga chhût chuan 17.21% a ni ang. Kum lo kal turah hian kan State in kan thawh chhuah ve tur zawng zawng hi Cheng Vbc 2616.33 ni tura chhût a ni a, kum kal meka hmuh beisei aain 7.45% in a pung dawn a ni. Kan sum hmuhna hnar lian zualte chu GST (43.95%) te, Sales Tax (5.88%) te, Energy bill (32.29%) te, Tui bill (3.09%) te an ni.

19. Kum 2025-26 ah hian Revenue Surplus Cheng Vbc 562.91 neih theih beisei a ni. Hei hi GSDP atanga chhutun 1.56% a ni.

20. Kum 2025-26 chhunga kan fiscal deficit chu Cheng Vbc 1651.68 ani dawn a, chu chu GSDP atanga chhûtin 4.57% a ni a. Hei hi kum kal mek 2024-25 (BE) a GSDP hlui zawk Cheng Vbc 48037.52 atanga chhût, 2.84% ai chuan a sang viau a ni. Kum kal meka kan Fiscal Deficit (RE) Cheng Vbc 1365.70 pawh hi GSDP revised figure Cheng Vbc 34003.27 atanga chhût phei chuan 7.63% zet a kai chho a ni. Hetia fiscal deficit percentage sang viau anga a lan lai hian a tak takah erawh chuan kan fiscal deficit hi kum kal mek aia kum thara a punna tur chu Cheng Vbc 285.98 chauh a ni. Engpawh ni se, GSDP figure te hi projection an ni a, actual figure hriat a nih hunah heng hi la siam rem tur an ni ang. Tin, GSDP chhût dan thar hmanga kan kal tak avangin kan GSDP chu a lo tla hniam ta a, hei vang hian kan Fiscal Deficit percentage chu a lo sang ta thung a ni.

21. Kum kal mek 2024-25 (BE) ang chuan kan Debt/GSDP ratio chu 29.22% niin, kan leiba tling khawm chu Cheng Vbc 14034.76 a ni. Hetih lai hian kumin vêk 2024-25 (RE) ah chuan kan leiba chu Cheng Vbc 13030.82 a ni a, Cheng Vbc 1003.94 zet in a tla hniam a ni. A tlak hniamna chhan chu tun hnaiah K. Deposit leh D-III bakah GPF Withdrawal Cheng Vbc 1623.77 kan release te, Lapse Deposit atana puan Cheng Vbc. 60.19 te hmanga Public Accounts leiba tih hniam a nih vang a ni. Hei bakah hian kum kal meka sum pûk tura ruahmante a takah chuan kan pûk vek lo bawh a ni. NABARD-ah Cheng Vbc 250 pûk tura kan dah lain Vbc 180 vel chauh kan puk dawn a, REC-ah Cheng Vbc 2, NCDC-ah Cheng Vbc 5, SIDBI-ah Cheng Vbc 30, Urban Infrastructure Development Fund (UIDF)-ah Cheng Vbc 25 te dah mah ila henghi kum kalmekah kan pûk dawn lo a ni. 2024-25 (RE)-a kan Debt-GSDP ratio chu 38.32% a ni a. Hei hi tarlan tawh angin GSDP chhût dan thar leh rintlak zawk kan hman tak vang a ni a. Hemi kal zelah hian Kum 2024-25 (RE)-a kan GSDP chu Cheng Vbc 34003.27 ah a tla thla ta a, hei hian Debt- GSDP ratio a rawn tisang ta zawk a ni. Hetiang zela kan kal hian, kum thar 2025-26 (BE) a kan leiba tling khawm chu Cheng Vbc 13999 ni tura chhût a ni a, Debt-GSDP chu 38.79% a ni ang. Kan leibat tlingkhawm lo punna chhan pakhat chu SASCI loan kan hmuh that vang a ni.

Pu Speaker, kan leiba hi a percentage zawngin sangin lang mahse a takah chuan vaibelchhe sang chuangin a tla hniam a. GSDP figure dik kan hman tak avangin a percent erawh chu a lang sang mai a ni. Tin, SASCI ah hian kan hmuh that em avangin hei hian leiba sang angin a tilang bawh a ni.

22. Pu Speaker, Reserve Bank of India hian State Sawrkar te leiba avanga tal buai tur ven nan Reserve Fund pahnih min vawn sak a, chungte chu Consolidated Sinking Fund (CSF) leh Guarantee Redemption Fund (GRF) te an ni. Heng reserve fund te hi State Sawrkar-in contribution a pek atanga siam an ni. CSF hnuiaia sum investment engemaw zat leh a pungte hi State Sawrkar leiba rulhna turin a hman theih a, GRF erawh chu State Sawrkar-in a hnuiaia PSU leh Society te tana loan guarantee a pek, an rulh theih loh tlan chhuahna atana ruahman a ni thung. Tun February 2025 thlenga CSF-a kan sum neih chu Cheng Vbc 500.18 leh GRF ah Vbc 79.82 a ni. Kum 2025-26 ah hian heng Reserve Fund atan hian Cheng Vbc 80 leh Vbc 30 te dah tura ruahman a ni. Hemi kaihnhawiha thil pawimawh tak pakhat chu, RBI hnuiaia Special Drawing Facility (SDF) kan neih theih zat hi heng Reserve Fund atana kan contribution hian a hril thui hle a ni.

BUDGET ESTIMATES 2025-26

I RECEIPTS

A Revenue Receipts

23. State Sawrkar-in revenue kan hmuh theihna hnarte chu Own Tax leh Non-Tax Revenue te, Central Sawrkar chhiah insem te, Revenue Deficit Grant te, CSS hnuaia sum leh Central Sawrkar Atanga Grants-in-Aid kan hmuh te hi an ni a. Kum 2025-26 chhunga Revenue Receipt tura hmuh kan inbeisei zat chu Cheng Vbc 12947.61 ni tura chhût a ni.

(i) State's Own Tax Revenue

24. State's Own Tax Revenue atanga hmuh kan beisei zat chu Cheng Vbc 1478.26 a ni a, kum kal mek 2024-25 (BE)-a hmuh kan beisei Cheng Vbc 1312.42 aiin 12.64% in a pung a ni. Kum kal meka kan sum hmuh atanga 77.79% chu GST atanga kan hmuh a ni a, kum kal meka GST atanga kan hmuh tur Cheng Vbc 1045 atang hian kum thar 2025-26-a hmuh kan beisei chu Cheng Vbc 1150 ah a chho dawn a ni. Kan hmuhna kawng dangte chu Vehicle tax te, Land tax te, Sales tax leh Profession Tax leh a dangte an ni hlawn.

(ii) State's Own Non-Tax Revenue

25. State Sawrkarin Non-Tax revenue atanga kan hmuhna te chu energy bill, tui bill, State lottery, ILP, Sawrkar Guest-house e, RBI atanga Cash balance kan invest avanga interest kan hmuhte an ni. Kum tharah Non-Tax revenue atanga hmuh kan beisei chu Cheng Vbc 1138.07 a ni a, kum kal meka kan beisei aiin Vbc 15.68 in a tam dawn a ni.

(iii) Devolution of Central Taxes & Duties

26. Sawrkar laipuiin kum 2025-26 atana ram chhung State 28-te tana Chhiah insem tura a ruahman chu Cheng Vbc 14,22,444.11 a ni. Heta tanga Mizoram chan tur Fifteenth Finance Commission in min ruahmansak chu 0.5% a ni a, chu chu Cheng Vbc 7112.23 a ni. Hei hi kumin 2024-25 (BE) aiin 16.61% in a sang zawk a ni.

Pu Speaker, hei hi kan beisei aiin kan dawng hnem a, kan lawm hle a ni.

(iv) Finance Commission Grants

(a) Post Devolution Revenue Deficit Grants (PDRDG)

27. Fifteenth Finance Commission-in PDRDG atana sum min ruahmansak dan chuan kumin 2024-25 atan Cheng Vbc 1079 a nih laiin kum 2025-26 atan Cheng Vbc 586 a ni thung. He Post Devolution Revenue Deficit Grant hi ram chhunga revenue deficit nei thin state 17 te tana a ruahmansak a ni a, tunah phei chuan state 6 chauhin an dawng tawh dawn a ni. He sum ruahman a kum têla a lo tlahniam hian sum hmanna lama kan inpawhfân theihna a tih zim phah viau a ni.

Pu Speaker, hei hi kumtin a tlem tual tual dawn a, a tawpah chaun a zero (0) dawn a ni. Kan sum hnar lian tak hi hetiang hi a ni a, amaherawhchu tun 16th Finance Commission lo kalah khan theihtawp kan chhuah a, kan inremna thuthlung *Memorandum of Settlement* ah khan 'Mizoram chu *Special Category State* anga enkawl zui zel a ni ang' tih a chuang a. Khami ang khan min enkawl zui zel hi in ba a ni tiin kan lo sawi a. Chuvang chuan tlem tual tual tur chu a ni na chungin, heng State paruk (6) te zingah hian ngaihpaawimawh bik kan hlawn tur a ni kan ti a ni.

(b) Local Body Grants

28. Rural Local Body (RLB) te tan Cheng Vbc 74 leh Urban Local Body (ULB) tan Cheng Vbc 40 chu Finance Commission ruahmanna angin dah a ni a. Urban Local Body Grant atana sum ruahman hi Cheng Vbc 1-a a pun laiin, Rural Local Body Grant erawh chu Vbc 2 in a tlahniam thung dawn a ni.

Hei pawh hi 16th Finance Commission-ah nasa takin kan nawr a, beiseina sang tak kan nei a ni.

(c) State Disaster Risk Management Fund

29. Kum 2025-26 chhunga State Disaster Risk Management Fund (SDRMF) atana sum ruahman chu Cheng Vbc 57 a ni. He sum hi Central leh State Sawrkar te'n 90:10 ratio hmanga kan intum sem tur a ni. He sum hian State Disaster Response Fund (SDRF) leh State Disaster Mitigation Fund (SDMF) te a huam a. Kum lo kal turah hian SDRF tan 80% dah niin, chu chu Cheng Vbc 45.60 a ni a, leh SDMF atan 20% ruahman a ni a, chu chu Cheng Vbc 11.40 a ni thung.

(v) Centrally Sponsored Schemes (CSS)

30. Centrally Sponsored Scheme (CSS) te hi Central Sawrkarin Scheme a neih te State-in a tihhlawhtlinna tura sum a pek a ni a. Kum 2025-26 chhunga CSS atanga sum hmuh kan beisei chu Cheng Vbc 2314.04 a ni. Hei hi kumin 2024-25 chhunga kan beisei zat aiin Vbc 163.95 in a tlem zawk a ni. A chhan chu Samagra Siksha Abhiyan hnuaia CSS portion hnuaia sum hmuh tur a tlak hniam vang a ni ber.

Hei hi Pu Speaker, zawi zawi a tih hniam zel a, State Sorkar-in kan kuta kan ken tura Central Sorkar-in an hand holding ve a ni a, State Sorkar hi an sumin Central Scheme hrang hrangin min rawn dawm a, kum khua a min dawm rteng tur a ni lova, engtikah emaw kei mahni'n kan ken kawh ve zui theih tura an ruahman a nih avangin heng SAMAGRA ang chi te pawh an ti hniam hret hret a. State Sorkar-in kan regularize chhoih ve zel a ngai a ni.

Tun dinhmunah Mizoram hian CSS Scheme thahnem tak a kalpui mek a, chung zingah chuan Samagra Siksha Abhiyan (SMSA) te, khawpui leh thingtlangte tana in sak tanpuina Pradhan Mantri Awas Yojana (PMAY) te, Mahatma Gandhi National Rural Employment Guarantee Scheme (MGNREGS) te, National Health Mission (NHM) te, Jal Jeevan Mission (JJM), National Social Assistance Programme (NSAP) te, Atal Mission for Rejuvenation and Urban Transformation (AMRUT) te, Swach Bharat Mission (SBM) te hi a lian zualte an ni. December 2024 khan Mizoram pawh SNA SPARSH hmang thei tur zingah thlan ve a ni nghe nghe a. Hemi kal zelah hian, CSS kaihnawih sumte chu SNA SPARSH Model hmangin, rang taka release nghal zel tura ruahman a ni a. "Just in Time" release dan zuiin, RBI hnuaia e-Kuber platform hmangin release nghal zel tur an ni dawn a, CSS sum chelh khawtlai a awm thei tawh dawn lo a ni.

Pu Speaker, SNA SPARSH hnuaiah hian vbc 250 atanga vbc 500, chumi inkara engemaw ber chu dawn kan beisei bawk a ni.

(vi) Externally Aided Projects (EAP)

31. Externally Aided Project (EAP) hnuaiah hian project lian tak tak kalpui mek kan nei a. Health and Family Welfare Department hnuaia Mizoram Health System

Strengthening Project te, Mizoram State Super Speciality Cancer and Research Centre leh, UD&PA hnuaiia Aizawl Sustainable Urban Transport Project (PRF) te chu kan project thawh mekte an ni. Heng EAP hnuaiia sum te hi reimbursement system hmanga dawn an ni a, a funding pattern chu 80:20 niin, Grant portion atanga 10% chu loan hmangin State-in a rul bawk a ni. Kum 2025-26 chhunga EAP atanga grant kan hmuh tur chu Cheng Vbc 100 ni tura chhût a ni.

B. Capital Receipts

32. Pu Speaker, Capital Receipt chu sum pûk atanga kan hmuhte hi an ni ber mai a. A tlangpuiin hun bi neia kan dawn ni lo, public debt te, Sawrkar-in midang hnena loan a pûktir an rawn rulh let lehna te an ni. Public debt chuan Central Sawrkar leh financial institution atanga sum kan pûk te, Sawrkar asset leh bungraw dang tih ralna atanga kan hmuhte hi a huam a ni. Kum 2025-26 chhunga capital receipt atanga pawisa hmuh beisei zat chu Cheng Vbc 2251.15 niin, kum kal meka beisei zat Cheng Vbc 2025.63 aiin 11.13% in a sang a ni.

(i) Recovery of loans & advances

33. Kum 2025-26 chhung hian, State Sawrkar-a loan rulhna tling khawm tur chu Cheng Vbc 24.97 ni tura chhut a ni a. Heng loan-te hi State Sawrkarin co-operative society te leh sawrkar hnathawkte atanga loan rulhna lo lut turte an ni.

(ii) Public Debt

(a) Internal Debts

34. Kum 2025-26 chhungin Capital receipt hnuaiia Internal debt atanga sum pûk tura kan ruahman chu Cheng Vbc 1465.03 a ni a, chu chu kum kal mek 2024-25 a kan pûk Vbc 1482.03 aiin a tlem hret dawn a. Market loan atang hian Cheng Vbc 1150 chu pûk tura ruahman a ni a, hei pawh hi kum kal mek aia Vbc 20-a hniam a ni bawk. NABARD atangin Vbc 250, NCDC atangin Vbc 5, SIDBI atangin Vbc 30 leh UIDF atangin Vbc 30 bawk pûk kan tum dawn a ni.

(b) Loans and Advances from Central Government and other Financial Institutions

35. Kan Sawrkar chuan kum 50 hnua pek tur Interest-free loan, “Special Assistance to States for Capital Investment” (SASCI) chu lak chhunzawm zel kan tum a. Ram tana ro tling thil (asset) siamna atan SASCI atang hian Cheng Vbc 750 vel dawn theih kan inbeisei a. EAP loan portion atanga beisei Cheng Vbc 11.15 nen avaiin Cheng Vbc 761.15 chu Loans and Advances atang hian kum 2025-26 chhungin la turin kan inbuatsaih a ni. Hei hi kum kal mek BE 2024-25 aiin Vbc 251.15 in a tam zawk dawn a ni.

36. Tichuan kum 2025-26 chhnga Revenue Receipt leh Capital Receipt hnuaiia kan sum hmuh tur zawng zawng chu **Cheng Vbc 15198.76** a ni.

II DISBURSEMENTS

A. Revenue Expenditure

37. Revenue expenditure hnuaiia sum hman chhuah tur zawng zawng chu Cheng Vbc 12540.20 niin, kum kal meka hman tura ruahman Cheng Vbc 11957.04 aiin 4.88% in a sang zawk a ni. Kum 2025-26 chhunga sum hman tur zawng zawng atangin Revenue Expenditure tur hi 82.51% a ni. Revenue expenditure a sanna chhan tlangpuite chu Annual increment leh Dearness Allowance lo pung avanga sawrkar hnathawk hlawh lo

pung leh Pension payment lo tam chho zel te a ni a. Salary leh Wages atana sum ruahman hi Revenue expenditure zawng zawng atanga 30.54% zet a tling a ni. Hei bakah hian Power purchase atan te, sawrkar inrelbawlina hrang hrang atana mamawh lo sang chho zel te, sawrkar infrastructure hrang hrang— kawngpui, tui lakna, buildings, etc. enkawl leh vawn thatna atan te, sawrkar leibat tlingkhawmin a hrinchhuah apung (interest) rulhna turte a huam a ni.

B. Capital Expenditure

38. Pu Speaker, kum lo kal turah hian Capital Expenditure atana sum ruahman zawng zawng chu Cheng Vbc 2658.56 a ni a, kum kal meka ruahman Cheng Vbc 2455.08 aiin 8.29% in a tam zawk a ni. Capital Expenditure atana ruahman hi Sawrkar sum hman tur zawng zawng atanga 17.49% a ni. Capital expenditure chu Sawrkarin ram tana Asset ro tling, hmasawna lam thawh nana a hman leh, Sawrkar leiba tihhniamna atana sum hman sawina a ni a. Hei hian sector hrang hranga hun rei zawk daih tur infrastructure siamna atana sum ruahmante hi a huam a. Hemi atan hian revenue surplus neih theih a pawimawh a, chu chuan Capital Expenditure atana sum dah theihna remchang a siam a, chutih rualin State Sawrkarin revenue a hmuh theihthe hi a la tlem deuh avangin Capital Expenditure atan sum duh angin kan dah tam thei lo zawk a ni. Chuvangin, ram hmasawna hna tam leh chak zawka kan thawh theih nan, kan Sawrkar chuan revenue tam zawk hmuh theihna tur kawng a dap chho zel dawn a ni.

39. Sawrkar sum pûk rulhna tura sum sen hi leiba tih kiamna hmanrua a nih avangin Capital Expenditure huang chhunga dah a ni a. Kum 2025-26 chhunga hman turin Cheng Vbc 419 chu dah a ni a, hei hi kum kal meka kan ruahman aiin Cheng Vbc 71.83 in a tlem zawk a ni. Hei hi Open Market Borrowings (OMB) atanga kan sum pûk rulh tur tlem hretin a nghawng chhuah a ni.

40. Ti chuan Revenue Expenditure leh Capital Expenditure belhkhawm chu **Cheng Vbc 15198.76** a ni.

III SECTORAL ALLOCATIONS

A General Services Sector

41. General Services Sector hian developmental fund te chu awmze nei taka hman a nih theih nan a tanpui a, amaherawhchu, ei leh bar lama hmasawna a nghawng lutuk lo. He sector hnuaiah hian sawrkar ban leh kutke pawimawh - Legislature, General Administration, Election, District Administration, Home, Lok Ayukta, fiscal services enkawlina te dah a ni. He sector hnuaiah hian sawrkar leibat avanga a pung rulhna te, pension leh retirement benefit hrang hrangte pawh ruahman a ni.

42. General Services Sector atan hian Cheng Vbc 6510.39 dah a ni a, heng zinga Vbc 5031.80 chu revenue section niin, Cheng Vbc 1478.59 chu capital section hnuaiah dah a ni. He Sector atana sum dah hi Budget pum pui atanga 42.84% a ni a, kum kal meka kan sum dah Cheng Vbc 5663.74 atanga a punna tur chu 14.95% a ni ang.

43. General Services Sector hnuaiah hian CSS leh EAP atana Counterpart Funding kan dah Cheng Vbc 250 chu kum tharah pawh hemi zat tho hi ruahman a ni a. Hei hian Scheme hrang hrang leh EAP project te bakah proposal awm mek, ADB funded Mizoram Universal Health Care Scheme pawh huam tel thei turah kan ngai a ni.

44. Kan Sawrkar chuan kan police personnel te travelling allowance bill rei tak pending a nih avanga harsatna an tawhte kan hriatpui a. He harsatna chin fel nan hian Cheng Nuai 87.72 chu DTE hnuai an hmuh thin pangai bakah pek belh a ni a. Hei hian venhimna lam hna thawktute chu an mawhphurhna tha taka an hlen chhuahna kawngah a pui ngei ang tih kan beisei a ni.

B. Social Services Sector

45. Social Services Sector chuan mipui mamawh phuhrûkna lam, Heng- Education, Sports, Health and Family Welfare, Water Supply and Sanitation, Housing, Local Administration leh District Council, Social Welfare and Nutrition, Information and Broadcasting, Labour and Employment te a huam a. He Sector hian mipui nunphung mamawh leh hmasawna lam a hawi a ni.

46. Kum 2025-26 chhunga Social Services Sector atana sum dah chu Cheng Vbc 4747.24 a ni a, chu chu budget pum pui atanga 31.23% a ni. Heta tanga Cheng Vbc 4475.21 chu revenue section hnuai a awm ang a, Cheng Vbc 272.03 chu capital section atan hman a ni ang. Social Services Sector-a kum thara sum dah hi hian kum kal meka sum dah Cheng Vbc 4967.09 aiin 4.43% in a hniam a ni. A chhan chu nichinah kan sawi tawh a SAMAGRA tih e, khang kha a lo tlak hniam tak vang a ni.

47. PHE Department hnuai tui Pump-na turin Cheng Vbc 60 dah a ni bawk a. Kum kal mek aiin Cheng Vbc 10 in a tam a ni.

48. Pu Speaker, kan Sawrkar hian mipuite hriselna lam kan ngaihpawimawh avangin, kum thar budget-ah hian Health Care Scheme atana kum kal meka kan dah Cheng Vbc 20 chu Cheng Vbc 50 ah kan tisang a. State Lottery atanga hmuh Cheng Vbc 20 kan dah thin bakah Cheng Vbc 30 belhin Cheng Vbc 50 hi dah a ni. Tin, medical reimbursement atana Department hrang hranga allocation kan pek bakah, Cheng Vbc 100 kan ruahman a, hei hi Sawrkar hnathawkte'n medical bill te rang zawka an lak theih nan leh, medical bill tling khawm tam lutuk thin pumpelna atana ruahman a ni.

Pu Speaker, a hun taka Sorkar-in a pek theih loh chuan, Sorkar-in penalty a chawina tur thlengin ruahman a ni.

49. Samagra Shiksha Abhiyan (SMSA) hnuai thawkte leh DIET hnuai thawktute hlauh, Central Sorkar atanga grant kan hmuh tur leh State matching share in a daih bak "Top-up" SMS atan Cheng Vbc 85.3 chu ruahman a ni. Tin, ICDS hnuai hian Women & Child Development hnuai thawktute thin, Central atanga an sum dawn thin a lo tawp tak avanga harsatna tawkte tan "Top-up" SMS atan Cheng Vbc 4.97 chu State fund atangin ruahman a ni bawk.

50. Kum kal meka kan lo tih dan ang bawkin, kum tharah hian, thingtlang lam mi, a mamawhte tana a thlawna ruang phurhna turin Cheng Vbc 5 ruahman leh a ni.

C. Economic Services Sector

51. Economic Services Sector chuan ei bar zawna leh hmasawna hnathawhna lam, heng - Agriculture leh a kaihnawih ho te, Rural Development, MLA Local area Development Fund, Power, Irrigation and Flood Control, Road Transport, Communication, Science and

Technology, Environment, Tourism, Civil Supplies leh a dangte a huam a ni. He sector atan hian kum tharah Cheng Vbc 3518.37 chu ruahman a ni a, chu chu budget pumpui atanga 23.15% a ni. Kum kal mek budget Cheng Vbc 3279.96 atangin 7.27% in a pung a ni.

52. Pu Speaker, kan Sawrkar chuan Economic Sector hnuaiiah hian flagship programme, “Mizoram Bana Kaih (Hand Holding)” atan kum 2025-26 chhungin Cheng Vbc 350 kan ruahman a. Hei hi kum kal meka hemi puala kan dah Cheng Vbc 200 aiin 75% in a sang a ni.

53. Kum kal meka Petrol leh Diesel atanga Road Maintenance Cess kan lakkhawm Cheng Vbc 15 atangin Mizoram State Road Fund Board in a lo hman atana kan dah thin Cheng Vbc 40 chu kum tharah Vbc 55 ah kan san chho a. Hei bakah hian, heng item atanga kan lak tho, Social Infrastructure and Service Cess atana kan hmuh tur Cheng Vbc 15 chu education, health leh social welfare sector atana hman turin kan ruahman bawk a ni.

54. Cheng Vbc 30 chu PWD hnuaiia kawng enkawlina leh chei thatna turin dah a ni a, Cheng Vbc 70 chu kawngpui leh leidawh te, a project pawimawh dan azira hman tura ruahman a ni bawk.

Pu Speaker, ‘In va dah tlem ve?’ in ti mai thei a. Hei chu a ve lek a ni. Heng atana hman tur sum hi source dang atangin thahnem zawk daih kan hmu dawn a ni.

55. He Sector hnuaiiah bawk hian Power leina tur Cheng Vbc 500 dah a ni a, kum kal meka dah aiin Vbc 100-in a pung a. Tin, Cheng Vbc 199.77 chu Power subsidy atan dah a ni bawk a. Kum kal meka kan dah aiin Vbc 11.46 in a tlahniam thung dawn a ni.

56. Power & Electricity Department-in power generation leh transmission atana an hnathawh tihchak nan leh, transformer hluite thlak nan State fund atangin Cheng Vbc 10 dah a ni a. Tin, Rooftop power grid subsidy atan Cheng Vbc 3 leh, infrastructure asset dangte siam nan Cheng Vbc 7 chu kum lo thar turah hian dah a ni bawk.

IV. CHARGED AND VOTED EXPENDITURE

57. Kum 2025-26 chhunga sum hman tur ruahman zawng zawng (gross estimated expenditure) chu Cheng Vbc 15198.76 a ni. Food, Civil Supplies & Consumer Affairs Department hnuaiia Buhfai hralhna atanga kan hmuh let tur (recovery) leh Printing & Stationeries leh Public Works Department atanga bungraw hralhna kan hmuh let tur zawng zawng (deduct recoveries) Cheng Vbc 155.50 paih hnuah, kan net estimated expenditure tur chu Cheng Vbc 15043.26 a ni ang.

58. Total estimated expenditure atanga Cheng Vbc 1363.34 chu Charged Expenditure a ni ang a, a dang zawng, deduct recoveries tiamin, Cheng Vbc 13835.42 chu Voted Expenditure a ni ang. Hei hi he House Zahawm takin a pass ngai chin a ni.

V. SUPPLEMENTARY DEMAND FOR GRANTS

59. Pu Speaker, kum kal mek 2024-25 atana kan revised estimate, Supplementary Demand atana ka rawn pharh chu Cheng Vbc 3512.33 a ni.

60. Budget estimate pangngai baka supplementary demand lo awm thinna chhan tlangpui te chu– SASCI atana allocation kan hmuh baka kan dawn belh te, CSS atana kan sum hmuh beisei aia kan hmuh tam tak vang te, Cyclone Remal, 2024 avanga sum hman lo pung ta te, medical reimbursement leh kawng danga sum hman tur ruahman sa aia lo sang chho te avang an ni hlawm.

61. Kumin Sawrkar kum 2024-25 chhung hian, a chunga a chhan hrang hrang tar lante avang khian, kan Budget Estimate aiin a taka kan sum pek chhuah chu Cheng Vbc 3512.33 in a tam zawk a. Hei hian Charged Expenditure hnuaiia sum pek chhuah Cheng Vbc 36.12 leh, Voted Expenditure hnuaiia Cheng Vbc 3476.21 te a huam a. A hnukung zawk hi he House in kan pawmpui ngai bawh a ni. Ruahman sa piah lama heng sum kan pek chhuahte hi a tira kan hriat lawk loh mamawh lo kalte phuhrûk nana Sawrkarin a pek chhuahte bakah Centre lam atanga sum hmuh belh hrim hrim Budget-a dah luh ngaite vang a ni.

CONCLUSION

62. Chutichuan, Pu Speaker, Kum 2025-26 atana Budget Estimate, (Charged Expenditure tel lovin) Cheng Vbc 13835.42 chu he House Zahawm takah hian sawiho tur leh min pawmpui atan ka rawn pharh e.

63. Budget Estimate bakah hian, kum 2024-25 atana Supplementary Demand (Charged Expenditure tel lovin) Cheng Vbc 3476.21 chu he House Zahawm takin min pawmpui atan ka rawn pharh tel nghal bawh a ni.

Ka lawm e.

SPEAKER : A lawmawm e. A copy han sem rawh u le. Aw le, kan Chief Minister zahawm tak, Finance changtu ni bawh Pu Lalduhoma'n heng –

- 1) 'The Annual Budget for the Year 2025-26 (with allied papers)';
- 2) 'Supplementary Demand for Grants for the year 2024-2025' te chu a pharh ta a.

Kan changkim em aw? Kan changkim chuan a lawmawm e. Tunah chuan kan chawl rih ang a, chawhnu dar 2:00-ah kan chhonzawm leh dawn nia.

(Recess at 11:24 AM)

2:00 PM:

LEGISLATIVE BUSINESS

SPEAKER : Chawhma lama kan sawi tawh ang khan tunah chuan Legislative business ah kan kal ang a. Vawiin ah hian Govt. Bill pahnih sawi ho tur kan nei dawn a, chungte chu - 'The Mizoram State University Bill, 2025' hi, a bill neitu, Dr. Vanlalhlana, Minister zahawm takin House-ah introduce phalna rawn dil turin i lo sawm ang.

DR. VANLALTHLANA, MINISTER: Pu Speaker, i phalna leh he House zahawmtak remtihain, 'The Mizoram State University Bill, 2025' hi he House zahawm takah hian introduce ka rawn dil e.

SPEAKER : Aw le, bill neitu Minister zahawm takin House-ah introduce

a rawn dil a, kan phal sak em? (House-in a phalsak a.) Kan phalsak chuan, tunah introduce-a sawi ho turin rawn move nghal sela. Amah ilo sawm ang u.

DR. VANLALTHLANA, MINISTER: Pu Speaker, I phalna leh he House zahawm tak remtihna in ‘The Mizoram State University Bill, 2025’ chu ka rawn introduce a, I phalnain ka han move chhonzawm nghal ang e.

Kum 2022 khan Higher & Technical Department in NEP- implementation task force a din a, chu task force chuan State University Bill siam vat a rawt a. Tichuan, July thla tawp, 2023-a Council of Ministers meeting chuan, ‘Higher & Technical Education Department in State University dinna turin hma la tan rawh se’, tiin thu tlukna a siam leh ta a, Sorkar hmasa hnuaia bill Drafting Committee, 16th August, 2023 a din chuan an buaipui nghal a. State University an kalpui dan te hmun dangah an va zirchiang a, ngun taka zirchianna neih a nih hnu ah ‘The Mizoram State University Bill, 2025’ chu ni 22.12.2024-a Council of Ministers thukhawm chuan Assembly Session neih leh hmasak bera pharh turin a pawm ta a ni.

A Bill a ka luh hmain Pu Speaker, thil paruk han tarlan hmasak phawt duh ka nei a –

‘NEP 2020’ kan tih hian khawvel sukthlek mil zelin zirna sang zawk kalphung a rawn her danglam ta bawih mai a. Higher Education bikah zirna kalpui dan thliar felin, inseng-hawi dan tur hetiang hian a duang ta a. Chutah chuan, a hmasa berah chuan, ‘Research Intensive University din’, tih a ni a. Hetah hian zirtirna (teaching) kalpui chungin zirbingna (research) lam ngawrh taka kalpui tur zirna-inpui, (University) buatsaih tur a ni a. Hetah hian Mizoram University, tuna Mizoram-a kan neih chhuna hi hetiangah hian leh a ni dawn a ni.

A dang leh ah chuan, ‘Teaching Intensive University’ tih a ni leh a, hei hi zirbingnate hlamchhiah lovin, under-graduate, post-graduate zirtirna uar taka kalpuitu tur zirna inpui (University) din leh tur a ni a.

Tin, ‘Autonomous-Degree Granting College din tur a ni’ a ti leh a. college lian, mahnia degree, hemi thiam thil nemnghehna certificate te, degree te pechuak thei khawpa changtlung din kha a tum leh a ni a.

Tin, kum 15 chhung (2020 atanga chhiarin) University hnuaia college degree pekna ang chi hi tihtawpa, college te hian an mahniin inenkawl sela, Autonomous College hi awm tawh sela. Tin, ‘State college ang chi hi chu University hnuaiah awm tawh sela, ‘Constituent College’ angin awm tawh rawh se’, tiin ruah hmanna a siam a. Chutiang chuan chi 4-in a rawn buatsaih chho a ni.

Pu Speaker, hetah hian NEP recommendation anga kal tur hi chuan tun dinhmun ah chuan Mizoram hi engmah kan la dawng thei lo a. University kan nei lova, constituent college pawh kan nei lova, tin autonomous college pawh kan nei lova. Kan hmabak a la ko khawp mai.

Central sawrkar leh funding agency atangin university te tan tanpuina grant hi a awm ve nual a, PM-USHA, a hmaa ‘RUSA’ kan tih thin a kha tunah chuan ‘PM-USHA’ tih a ni ta a. Entirnan: - Uttar Pradesh ah te chuan State University 6 lai an neih avangin crore 20 te, crore 100 chuang te an hmu a, chutiang chuan an inbuatsaih a. College thenkhatin crore 100 te an hmuh rualin, thenkhatin 100 tling lo deuh an hmu a. Nikum ringawt pawh khan state thenkhat

chuan crore 740 an dawng a. Chutiang chuan, keini hian a dawthleng kan neih loh avangin dawn ve tur kan neilo thin a. Hetianga State University kan lo din tawh chuan khang kha kan dil ve thei tawh dawn a, crore 100 thleng an pe ve thin a ni.

India ramah hian State University 481 a awm laiin, Northeast ah chuan State University 27 kan nei a (ka hre soal a nih loh chuan), Nagaland nen State University neilo awm chhun kan la ni leh nghal a. Kum 2035 ah hian Mizoram University hi Research University a nih tawh dawn avangin, college nena inhnawm a remchang tawh dawn lo a, a affiliate thei tawh dawn lo tihna ni a. Chumi a nih avang chuan heng kan state-a college awmte, private-te pawh a ni ang chu, chung ho lo kuah khawma, an tana ruahmanna lo siama, degree te pawh lo pek sak tu tur University chu kan mamawh ta a.

Zawhna a awm tam khawp mai a, he thil ah hian, “engatinge airport pawh enkawl thei lovin University an buaipui”, tih kha a rawn ri ta thin a. He thil hi kan duh vang pawh a ni lo a, Mizoram University helaia kan neih chhunin college a enkawl tawh dawn loh avangin, a lo enkawltu tur State University hi kan din a ngai ta si a. Kan din loh chuan State pawn University-te hnuaiah kan ram chungah kan State college hote hi an inziahluh a ngai tawh dawn a, a state ang pawhin zahthlak a tling dawn a. Chuvang chuan, kan inbuatsaih a ngai cho ta a ni.

University lian pangngai - MZU te, ICAFI te, helaia kan Act kaltlanga din a ni a, chutiang chuan tam tak college zir chhuakin, an bel a. Chutah chuan lut lo tam tak an awm a, lut theilote anni ang chu, inziak tling lo tam tak an awm a. Mizoram University ah khuan seat 1100, (Ph. D nen) awmin a hriat a. Chutah chuan kumtin mi 6000 – 8000 inkar hian an dil thin a. Covid lai khan an tam deuh a, 8000 an chuang chho a. Seat awm 1000 bawr a nih laiin, mi 5000 velin an chang lo thin ta a, ICAFI ah pawh eng emaw zahin an dil a, chutiang chuan zirlai tam takin zirna sang zawk an bel thei lo thin a. State University kan neih chuan, kan thalaite ten zirna sang zawk an bel thei tawh dawn a. Chutiang chuan, an tan thil tha pawh a awm thei turah kan ngai a ni.

University nih phung chungchanga hi sawi ngaiin ka hria a, nakin ah a Bill ka luh hunah pawh tarlan tel tho chu a ngaiin ka ring a.

Mizoram State University hi, inhnialna a tam khawp mai a, Cluster of Colleges anga kalpui a ngai dawn a. Zirna-In sang college hote hian University an kalpui a ngai a, hei hi state dangah pawh an lo kalpui tawh a. ‘Keini state pachhia/sum neilo tan chuan a lo tih chi em em a ni’ tih te kan lo zir chhuak tawh a. Chuvangin, college kan neih sate hmang hian University kan din a ngai a. College kan neih sate hi Arts zirna school bik, Arts ah pawh humanities school te kan han ti ang a, college pakhatah kan dahkhawm ang a. Chutiang chuan, social science te, physical science te, economics te, management lam te, commerce te hmunkhatah kan dahkhawm ang a. Chu chuan University kan siam dawn a ni.

Cluster of Colleges siam tur hian college thahnem tak, inhnaih taka awm ngaite a awm thin a. Hei, tunhnaiiah Lunglei atang te, Champhai atang te leh VC thenkhat atang te leh khawtlang atang te pawh a niang chu, University an ram chungah te, an khuaah te, anmahni hmun ngeia din tura ngenna kan dawng a. Kar hmasa lawk pawh khan, a bik takin Champhai leh Lunglei khawpuia MLA te kan han inko a, kan han ti-ti ho a, an tang viau nghe nghe lehngal a. Hei, Pu Laltea leh Pu MST-a an thu dun lehngal a; anni pahnih hi

an intiat khawp mai a, boxing gloves awm pheii sela chu, referee nih nghal ngai hial khawpin an rawn tang a ni. Amaherawhchu, kan dinhmunin a zir ngang lova. Tuna kan dinhmunah hian hmanhmawh taka University kan mamawhna en hian Aizawl-a kan college neihte hi pawtkhawm ila, hengho hmang hian ‘University chu I din mai ang u’, tiin, ruahmanna kan siam ta a.

University reng reng hi state pawn atangin kalpawh awlsam nih te a ngai a. School ho ah hian external members te an awm a, thil chi hrang hrangah visitors te hmun dang atangin an rawn kal a ngai thin a, chutah chuan Airport atanga han kal zung zung theih te kan han duh ve bawk a. Chutiang anih avang chuan, ‘a bultanna atan chuan Aizawlah hian ti phawt ang’, tiin, thutlukna kan han siam rih phawt a ni. Nakin zelah chuan Pu Speaker, Aizawl pawnah school te pawh la hawn dan awmin ka ring a. Chutiang chuan, miina min ngenna leh an inhuamna a zahawm em em rualin, kan dihmunin a tlin ngang loh avangin Aizawl ah State University hi kan din a ngai ta a ni.

Sawi tur tam tak a awm na a, a bill ah ka’n lut ang a. He bill hi sorkar hmasa hnuai, kan Minister hmasa Dr. R. Lalthangliana hnuaiah thui tak kan lo kalpui tawh a. Amah leh kan official taima tak takte hmalakna azarah tun hun hi kan thleng thei a ni.

He bill hi a thui ang reng a. Preamble ah hian University ruangam tur a rawn sawi a. ‘State sorkar neih resource awmsa hmang tangkai tura duan tur a ni’, tiin a rawn sawi a. Tin, section 3-na leh 4-na chho ah khan, ‘a hmingah Mizoram State University tih a ni ang’, tiin dah nghal a ni a. A hming chungchang pawh hi sawi tur a tam mai thei. Amaherawhchu, nakinah kan sawiho duh takin, kha chu ka rawn tuihni lo ang a.

Tin, ‘sawrkar hnuai college awmte hi University Constituent College a ni vek ang’, tiin a rawn dah bawk a. University thuthmun tur chu Aizawl a ni dawn a, a thuneiha huam chin tur chu Mizoram a ni ang.

Section 6 hi, he bill in a tumah chuan, ‘Objects of the University’ tih a rawn lang ta a. ‘Zirlaite tan quality education a chhawp chhuak ang a, chhawrnaawm takin zirlaite a buatsaih ang’, tih a ni a. Tin, ‘zirna chi hrang hrang - humanity, social science, engineering, technology, entrepreneur leh vocational course te a rawn dah pawimawh ang’ an ti a.

Section 8 ah hian, Pu Speaker, he thilah hian ZPM pawhina kan atchilh thil - skill development te bilh tel kan tum nasa viau a ni. Startup center te, technological development center dina a zir bingna, State leh thalaiten an tangkaipui theih ang zawnga kalpui tum a ni.

Section 9-ah hian ‘Heads of the University’ tih kha tarlan loh theih loh a ni a. Chancellor ah hian Chief Minister a ni dawn a, state thenkhatah chuan Governor a ni a. Keini ina kan rawn putluh ah hi chuan Chief Minister a ni dawn a. Pro-Chancellor ah Higher & Technical Minister kha a ni zel dawn a ni.

Section 10 ah chuan University hrang hrang ina an neih ang thoin, Vice Chancellor te, Registrar te, Finance Officer te, Librarian te, Controller of Examination te neihna tur a rawn tarlang a.

Tin, University ina a mamawh section 14 - 23 ah khan tarlan a ni leh a. University hian Court a nei ang a, Council a nei bawh ang a. Academic Council te, School Board te, Under Graduate studies, Board of UG te, Board of PG studies te; Finance Committee te, College Development Council te a ni ang a. Chung ho enkawl tur chuan mite ruat an ni dawn a ni.

Tichuan, University hian rules an tih ang deuh hian ordinance an siam a, chumi hmanh chuan University kalphung tur, a kal dan turte buatsaih thin a ni a. Section 26 leh 27 chho ah khan ordinance leh regulation te rawn tarlan a ni leh a. Tin, Annual Report pek thin a ni ang a, Annual Accounts siam thin a ni bawh dawn a ni.

Pu Speaker, kan bill ah hian section hrang hrang a awm a. Chutah chuan section 43 naah hian kan kai deuh dawrh ang a. Zawhna te in ngahin ka ring a, a sawihawna chu ka duh tawh hnai dawn ang a. Section 43 ah hian he Bill hi Act a nih hunah chuan, a sawifiah theih tawh loh sawifiah ngai awm kha ‘Chancellor thuneihna a ni tawh dawn a ni’, a rawn ti a.

Tichuan, section 44 ah hian, ‘University din a nih atanga kum 3 ral hmain harsatna eng emaw, her rem ngai awm se; he Act hi a kal loh phawt chuan sorkarin order hmangin a siam tha ang’, tih a ni a. Hei hi ‘engatinge’ kan tih pawh a ni mai thei a, University din a niha an hman thin a ni a. Kum 3 chhunga a lo insiam chhoh ah te, khatianga Dan lian pui puia han kalpui loha amendment han tih rup rup ngai lo khan, ‘kum 3 chhung hian a inher rem thei ang’, tih hi dah thin a ni a, chu chu telh a ni.

He bill in a tarlan lohte nakinah sawi tur pawh kan ngahin ka ring a, sawifiah zual ngaite pawh a awm ang a, chu chu kan la inhrilhfiah thei turah ka ngai a. Tin, rules te, ordinance te leh regulation te a la awm chho dawn a. Chungah chuan kimchang tak, chipchiar taka tarlan a la ngai dawn a ni.

Tichuan, Pu Speaker, ‘The Mizoram State University Bill, 2025’ hi Mizoram zirnain bungthar pawimawh tak a kai nan ngun taka min sawipuia, min pass pui ngei turin, he House zahawm takah hian memberte ka ngenin, ka rawn move a ni e. Ka lawm e.

(Speech not corrected.)

SPEAKER : Aw le, kan Minister zahawm takin a bill chungchanga sawi turte sawiin, a rawn putluh chhante min hrilh a. Tunah kan sawiho ang a, member pakhatin hun engtia rei nge kan inpek ang? (House-in minute 5 inpek a remti a).

Aw le, sawi hmasa ber turin member zahawm tak Pu T. Lalhlimpuia ilo sawm ang.

PU T. LALHLIMPUA: Pu Speaker, ka lawm e. Vawiina “The Mizoram State University Bill, 2025” kan sawi thei tur hi a lawmawm hlein ka hria a. Heti zawng hian han sawi ta ila - Zirnaa kan nakin hun tur hi vawiinah hian sawi hovin, kan rel dawn a ni a. Chuvang chuan, tun tum session-a kan bill sawi tur hi a pawimawh filawr-lak ah ka ngai a. Chutih rual chuan, he bill - pawimawh em em leh ngaih pawimawh tur em em, ruahmanna fel tak nena kan Minister Dr. Vanlalhlana’n kum khat lek chhunga vision fel tak neiin, kan ram hmasawna tura hemi hun chhung leka a rawn chhawp chhuak hi lawmawm ka ti a. Chutih rual chuan, he bill hi a tulnain min nawrna avang pawhin vawiinah hian kan sawi ngei ngei kha a ngai a. Chuvang chuan, vawiina House Member zahawm tak takte pawhin chumi zawnga kan ngaihtuahna kan sen erawh a tuln ka hria a ni.

India chuan NEP 2020 hi July, 2020 khan covid karah khan a rawn tichhuak kha a ni a. NEP 2020 chuan education field-ah revolution siam turin scholars te leh researcher te, educationist te chu siam turin a beisei a. Tuna kan education system kalpui mek - class kal, lecture ngaihthlaka exam leh evaluate-a degree inpek system te hi eng emaw chen chu a rawn thlak dawn niin a lang a. Tin, NEP 2020 chuan chung thil chu kan society ah leh stake holder-ah te nghawng a tha zawngin he zoram-ah pawh hian a neih beisei a ni. Mizoram chhung State University-a kan stake-holder lian ber pawl zing ami MCTA chuan NEP-2020 draft stage-a a la awmlai khan, kum 2019 khan zirchianna a lo nei daih tawh a, an zirchiannaah chuan he bill (vawiina kan neih mek) Mizoram State University neih hi, a tha an ti a, chu chu sorkarah pawh an lo thlen tawh a. Tichuan, sorkar leh stake-holder ten lungual taka he bill pass tura kan pen ho thei tur pawh hi vawiinah hian a phurawm ka ti a, Mizoram State University din hi a phurawm hle a ni.

Pu Speaker, he bill hi a text lamah luh vak ngaiin ka hre lova. Section 44 laia siamin, clause eng emaw zat a awm a, guideline fel taka siam a ni bawk a. Amaherawhchu, a wording eng emaw han thlak ve hlek ngai te a awm em tih erawh chu ka rilruah chuan an awm ve mai mai a. *Entirnan:* - pek 17, section 41 kha siamrem hlek a ngai em? Khalai kha ka han tarlang hlek duh a. Tichuan, education landscape ti danglam turin he NEP-2020 hi India chuan a lo duangchhuak ta a. Chumiah chuan work integrated education te, skill base learning education te bakah thil thar tam tak introduce a ni a. Vawiina ka tarlan len duh chu, a bikin skill-based learning education hi han sawi fan hlek kha ka'n duh a. Chu chu University leh a neitu sorkar thuneihna-in industry based in education kha eng emaw chenah chuan kalpui te pawh a tul dawn a. Sorkar pawhin chumi atan chuan a inbuatsaih ngei ngei a tul dawn a ni. Sorkar tan chuan vawiina kan thil sawi mek hi challenge nasa tak a ni dawn a ni. Industry chu education nena inkungkaihte pawh a tul ang a, education leh industry pawh bana inkaih tawn te pawh a ngaiin a rinawm a.

Entirnan: - Internet-based industry-ah Mizoram kan hnufual chuan, industry chu university curriculum nen a kalrual a ngai ang a, Mizoram kan hnufual chuan, industry dang emaw kha kan thawhpui te a ngai dawn a. Tiang chuan, music industry-ah te art & culture-ah te, sorkar leh university thuneitute'n ruahmanna an siam dan azirin education system hi khawvelah kan dakchhuak thei dawn niin ka hria a ni.

Pu Speaker, UGC chuan Higher Education Institutions te chu multi-disciplinary institution ah chantirna tur kaihhraina hetah hian a siam a. Nichinah kan Minister-in a sawi ang khan, college hrang hrangte insuihfinin, clustering siam tura ruahmannaah accreditation te awlsam zawk leh tha zawk hmu theih tura pui thei turah a ngaih theih a.

Tin, University te, kan institution hmingthang tak tak te leh industrial house hmingthang tak tak te nena thawhhona hmanga course hrang hrangte pawh helaiah hian a bilh tel theih vekin a rinawm a, online leh open distance learning mode course te pawh a hman tangkai theih dawn niin a lang a. Tichuan, NEP-2020 hnuaiah chuan University chhungah - language, music, philosophy, art, dance, mathematics, statistics etc. translation leh sports thlengin a awm thei turah a ngaih theih a ni. Tichuan, sorkar-in a hranpa liau liaua University din a hautak zia hriaa, college awmsa eng emaw zat insuih finna Cluster of colleges hmangin state university din a tumna hi a finthlak hlein ka hria a, sum leh pai senso pawh a zahve dawnin a hniam phah thei a ni.

Pu Speaker, (i remtihain,) Bill phok 2-na, section 3 - Establishment of University hnuaiia clause 2-ah khan “from the functioning of the university the existing colleges and institute so cluster shall sees to exist as college or an institute and shall be deemed to have converted into an function as university the existing property land and building of this institution shall vest with the Mizoram University” tih kha a ni a. Tichuan, college chin chunglam zirna te hi 2035-ah chuan mahni theuha degree pe theitu ni vek tawh tura tih a ni a, affiliation system zawng zawng hi tihbo tura ruahmanin tuna kan college neihte (Pachhunga University tih loh) chu affiliated college vek an ni a. Chuvang chuan, State University hmun turah pawh buaina awm turah ka ngai chiah lova. NEP-2020 guidelines in a tarlan angin, 2030 ah chuan state tin chhunga district tinah higher educational institution lian tak pakhat theuh awm tura beisei a ni a. Tuna MZU hi kan mitthla a ni maithei a, NEP-2020 guidelines-ah chuan, State University hi hmun khatah lianpuia subject zawng zawng zirna inkhung vek ang kha a tum a ni lova, MZU hnuaiia district emaw, cluster college anga awmin sorkar leh autonomy college ten subject an offer a zirin Aizawl zirlai pawh Lunglei ah te, Champhai ah te, tiang chuan hmundangah pawh zir a tul dawn niin a lang a, mahni hmun theuha dah tumna ang boruak pawh hi thil tul tak niin a lang lo a ni.

Sawi tur a tam mai a, hun a rei si lova. UGC leh AICTE ten college tina seat allotment an pek te hi State University kan neih chuan Mizoram Sorkar thuneihna hnuaiia anih tawh dawn avangin, admission leh seat allotment-a kan harsatna te pawh hi sutkian anih a rinawm a, a nghahhlelawm hle a ni.

Chuvangin, Pu Speaker, “The Mizoram State University Bill, 2025” hi pass ngei turin ka thlawp e. Ka lawm e.

(Speech not corrected.)

SPEAKER : Awle, Member zahawm tak Pu R. Rohmingliana i lo sawm ang.

PU R. ROHMINGLIANA: Pu Speaker, ka lawm e. Mizoram State University Bill vawiinah kan han sawi dawn a ni a, a engemaw zawng chuan sawi i la barh luih university bill tih zawngte pawhin a sawi theih ang em aw, ka ti hial a.

A hmasa berin University han sawi hi chuan keini Mizoram-a cheng te tan chuan ICFAI University te kan rilru ah a lang vak lo; Mizoram University khu a lang deuh ber a. Khu University khu Mizoram State kan nihna in a rawn hrin chhuan, remna leh muanna in a rawn ken a ni a. Tin, ‘MNF movement vanga MZU khu kan neih a ni’ ti te pawhin sawi ta ila a dikin ka ring a. Zirna han sawi takah chuan zirna, University thleng tur pawh hian, State-in MBSE te, school te kan han nei a, ngaihtuahna a ti thui khawp mai a; sorkar-school tha tak tak hmun tinah kan din a. Amaherawhchu, vawiina helai a awm kan fate, kan tute hi ‘sorkar school-ah nge maw kan kal tira private school ah tho le?’ tih te hian ngaihtuahna min neih tir thui khawp mai. Chuvang chuan, he State University hrim hrima hi ‘a tha lo’ ka tihna lam nilovin. kan ngaihtuahna tizautu atan kha kha kan sawi hrim hrim duh a. Tin, hmanni lawkah Assam - Don Bosco University student tam tak zinga gold medalist chu Mizo a ni. Vawiinah helaiah hian fak a phuin ka hria a, ka’n tarlang ve duh hrim hrim a. State dangah leh private University angah te gold medalist kan han nei thei te hi a lawmawm hlein ka hria.

Awle Pu Speaker, a bu chhungah ka lut vak dawn lova, hetah hian thil tam tak a inziak a. Amaherawhchu, ‘Headquarters of the University shall be at Aizawl’ han tih lai te hi, tlem chuan Aizawl Municipal Area nge? ‘Aizawl’ han tih ngawt ah khan thil tam tak han sawi theih a awm ang a. Kha ai chuan, thildang NEP-2020 chungchang te nen helai hi han sawilan ka duh a. Kawng tam tak atanga han thlir chuan, ‘engah nge maw kan state pachhiat em em laia State University lo din tum chu a inhmeh dawn em maw ni le’ han tih theih a awm a, ‘tunah MZU kan nei reng alawm’ tih ngaihtuahna te pawh a awm thei ang a.

Amaherawhchu, kan ngaihthlak tak ang khan Pu Speaker, a rawn move-tu in fiah takin a rawn sawi a, New Education Policy, 2020 khan “helai kan MZU hi Central University anih avangin hetah kan in affiliate thei tawh dawn si lova; chuvang chuan helaiah State University kan neih mai loh chuan kan college neihsa te, college thar kan han sawi ang chi te thleng pawh khan kan in affiliate theih tawh siloh chuan; MZU ah chuan Pachhunga University College chiah constituent college a ni si a, a dang tan hian a buaithlak dawn em a. Chuvang chuan, he State University hi neih ni sela” tiin sorkar hmasa atanga lo en chhoh tawh kha, tun tumah bill a rawn lut ta a ni a. Hemi NEP-2020 hi 29th July, 2020 khan Union Cabinet khan a passed a, National Policy of Education rawn thlaktu tura tih kha a ni a.

Tichuan, Pu Speaker, NEP ah hian India ram zirna sang University leh College te siamthar rawtna tam tak a awm a, subject chi hrang zirna hmun multi-disciplinary college emaw, higher education institution-cluster, knowledge-hub ang zawnga hetah hian rawn kalpui a ni a. Chuti anih chuan, nakinah kan Minister zahawm takin a rawn wind up hunah khan Pu Speaker, I phalnain, “State University din ah hian NEP-2020 leh UGC kaihhruaina nen hian a inrem vek em tun dinhmun?” tih lai te pawh hi min rawn sawifiah sak se ka duh khawp mai a. Autonomous Degree Granting College AC tura college pakhatat duhdan an neih leh si ah entirnan:- ‘student 3000 tal an awm tur a ni’ tih te a ni, NEP 2020 ah hian. Chu chu Mizoram-ah khan kan nei thei si loh avangin, constituent college kan neih theihna tura he State University hi ruahman niin a lang a. Amaherawhchu, helai Mizoram ah State University nei ta ila, an rawn in affiliate duh ang em? Kan rama kan neih RIPANS kan tih te saw, anni saw central finance vek a ni bawk si, anni ang te hi kan dawr tawh em, engtianga kalpui tur neg, tih ang chi te. Tin, nakin lawkah State University hi din ta ila, ZMC te, MCON te leh health lama zirna hote hi, Health University an rawn propose mai ang em? Khatiang thleng khan kan ngaihtuahnaa awm turah ka ngai a.

Tichuan, he State University rawn irh chhuah dan hrim hrim leh he bill-a rawn thailan hrim hrim te hi chu a thain ka hria a. Amaherawhchu, kan Minister zahawm tak khan Pu Speaker, wind up hunah heng point te hi min rawn hrilhfiah thei se ka duh khawp mai a –

State University hi din ta ila, Higher & Technical Education Directorate hi ala awm zel ang em; hei hi thiah a ngai tawh mai ang em?

Tin, Professor leh Lecturer hna lakah MPSC hian an la zel dawn nge, State University anih chuan State khan a la tawh mai zawk dawn?

Tin, RUSA thlaktu PM-USHA atang hian State University dinna tur senso kan hmu ve thei ang em? Engzat nge kan hmuh theih ang, a dinna turah?

State University anih chuan, helaia department tam taka indaihlohna awm ang hian staff

shortage hi State University ah hian kan nei mai ang em? Sum kan la thei neih theih lohin, University quality lo deuh hi kan nei mai ang em? tih te. Kan political problem ang chi te pawh kan neih phah thei ang em? Helaiiah hian ‘Chancellor chu state dangah chuan Governor’ tih te leh ‘Chief Minister’ han tih laia te hi, engnge ni kan han tihchhan?

Tin, Tamil Nadu chuan he NEP-2020 hi an duh lo niin ka hria a, engnge a chhan kan zirchiang em; hengte hi kan ti ve thei mai em?

Tukin budget speech-a special category state kan nihna te kha hemi ah hian hman ve dan a awm em? Central lam te engang chinin nge kan lo dawr? tawh tih laite kha min hrilh thei se ka lawm khawp ang. Pu Speaker, ka lawm e.

SPEAKER : A lawmawm e. Member zahawm tak Pu H. Ginzalala i lo sawm ang.

PU H. GINZALALA: Pu Speaker, hun min pek avangin ka lawm e. ‘The Mizoram State University Bill, 2025’, bill tha deuh mai lo lut hi lawmawm ka ti a, thinlung takin lawmthu kan sawi hmasa a. He bill hi sorkar hmasa te lo initiate tawh a ni tih kha kan ngaitla a, a lawmawm ka ti khawp mai a. Sorkar hmasa te lakah pawh lawmthu kan sawi duh a. Chutihrualin, ‘sorkar hmasa te thil tha tih hi kan chhonzawm dawn a ni’ kan tih lai te a taka a lo lang hi lawmawm ka ti a ni. Chuvangin, kan zavaia hlawhtlinna lo lang niin ka hria a. Kan opposition lam te, Pu Speaker, i veilam a thute pawh an chungah lawmthu ka sawi a. Tun tum chu chhuak tau tawh lo turin ka ngen a. Nimin khan an chhuak tau a, mahse kan bye bye ve miah lo a nia. An chhuak leh a nih chuan kan bye bye ve maithei a ni.

Hei bill lo lut hi ka’n chhiar a, a tha khawp mai a, hmasawna tam tak a lo lut dawnin ka hria a. Amaherawhchu, Pu Speaker, he bill hi ka kalh, ka dodal tihna lam ni lovin, (memberte’n min hrethiam se), University Headquarters hmun turah hian, engatinge Aizawl kher kan tih lai hi ka sawi duh lai chu. Aizawl Centric lutuk a thil kan ti hi a dikin ka hre lo a ni. Pu Speaker, i veilama mite hi hemi ka sawi a vang hian lo lawm vak lo se, a thuphungin ka sawi ve mai a ni. Chuvangin, hmasawna kan tih pawh hi Aizawl pawnlamah hian thleng ve tawh se, he thilah kher lo, thil dangah pawh hian Aizawl centric ringawta thil kan ti hi a dikin ka hre lo.

Tunlai thiamna sang zawkah hi chuan ‘balance regional development’ an ti a, region tin hmasawn dan hi a inkhairual a ngai, chu chu ram changkangte kal dan a ni tlat a ni. Keini pawhin hei hi kan copy a ngai tawh khawp mai. India ram pawh hian ‘Look East Policy’ te an han ti a, kan vannei khawp mai. Delhi tlang a tangin Mizoram khawchhak tawp hi an rawn thlir a ni. ‘Act East policy’ te an ti bawk a. Engatinge Mizoram pawh hian Look East Policy kan ti ve mai loh? Look Champhai Policy pawh kan neih ve a ngai a ni a. Khawchhaklam i hawi ve teh ang u. Chuvangin, tunah hian Aizawl a tanga Champhai hi darkar 3 chhung kal lek a ni tawh a, connectivity kan nei tha a ni.

Aw le, he bill tha deuh mai lo lutah hian thil hmuh ka nei a, ‘Socio-Economic Development chawikanna tur a ni’ tih hi kan chhiar a ni. Hnam hniam, la develop loh kan ni a, tribal kan nihna hi kan inhriat a tha ka ti a. Kan culture tihhmasawna turah hian he University hian contribution nasa lutuk a neih ka ring a. A bik takin, kan sakhuana lam thilte pawh hi he State University Bill hian nasa takin a rawn chawikang dawn a ni. Chuvangin, heng

‘Theological College’ kan tih ang chi pawh hi a leng turah kan ngai a ni.

Tin, kan culture te pawh hi research anga kalpui tha ka ti a, a hmingah pawh hian ‘Mizoram State University’ ti mai lovin, tunah hian Mizoram University kan nei a, a inhnaih lutuk a, a confusing a ni. Chuvangin, ‘Zo-University’ ti te pawh hi ni nghe nghe sela, kan culture lam te pawh kan zir zau theih a duhawm a, research kan tih chhoh zel te pawh khi a ngai dawn in ka hria a.

Tin, hei, thil lawmawm deuh mai chu, honorary doctorate degree a pek theih tur thu te kha a inziak a ni. Pu Speaker, honorary doctorate degree te awlsam deuha inpek a nih theih dawn te phe chu, hei, kan member zahawm tak Pu Muanpuia te phe chu eng emaw hi pek ve ka duh. Kan society-a idea ah contribution nei thate awlsam zawkin doctorate degree kan pe thei dawn tur te hi hmasawmna ropui tak a nih ngei kan beisei a ni.

Aw le, Pu Speaker, “The Mizoram State University Bill, 2025” hi ka thlawp e. Ka lawm e.

SPEAKER : A lawmawm e, Member zahawmtak Pu Lalrintluanga Sailo i lo sawm ang.

PU LALRINTLUANGA SAILO: Pu Speaker, ka lawm e. Vawiinah “The Mizoram State University Bill, 2025”, a changtu Minister zahawm takin a rawn pulut hi a lunglen thlak ve hrim hrimin ka hria a. University te, High Court te hi kan mithiamten ngaihtuahna an neih hmian Bangladesh ngawpui karah kan lo ngaihtuah tawh thil a ni a. Khata ngaihtuahtu, remna rawn hawn tu zingah khan University hmupha pakhatmah kan awm lova, a zir sang ber kha BA a ni mai a. Tin, High Court rawn hawn tu, remna thuthlung ziaktu zingah khan Court awmzia hre miah lo hlir kha kan ni, Pu Speaker. Chuvangin, vawiinniah hian kei pawh hi, ‘engatinge i din ve ngawt?’ min ti mai thei a, amaherawhchu, hei hian lung a ti leng a, ram-hnukpui a ni tih ka hriat a vangin ka support hle a.

Kan Education Minister a inbuatsaihnaa helai, a tawpa a dah – ‘Statement of objects and reasons’ tih hi chhiarchhuakin, pass han dil mai sela chuan, kan pass duak maiin ka ring a. Chuvangin, member zahawmtak Pu Rohminga sawi ang khan, vawiinni ah hian ‘Barh-luih University’ tia han sawi theih mai tur a nihna chen a awm a. A chhan chu, National Education Policy, 2020 hi India ram pumah hman a lo nih chhoh tak zelah hian, kum 2035 a tang chuan vawiin nia University kan neih Central University, ‘MZU’ kan tih te khu zirna lamah a inthlurbik tawh lova, research lamah kalpui an tum tak a vangin, vawiin niah hian ‘University hi kan duh emaw, kan duhlo emaw kan neih hi a ngai ta a ni’ tih hi kan chiang vek turah ka ngai a. Helai, a bill tawpah hian chiang takin a rawn ziak a, a lawmawm ka ti a. Tin, State pakhatah University pakhat chauh neih hi kan inzo tawk tawh lo; admission chungchangah te pawh a buaithlak tawh hle, tih hi a langin ka hria a.

Chutih rual chuan, post-graduate chin phe chu kan mamawh lehzual a, India ramah literary percentage-ah sang viau mah ila, kan gross enrolment ratio ah hian kan hniam hle thung a ni. Chutiang avang chuan University-hran kan neih hi a tul hle a ni tih hi kan support a. Tin, Section hrang hranga a rawn sawi hi, kei ka chhuang hle mai a. Kan Chief Minister ngei te (a tute pawh Chief Minister sela), Chancellor-a kan han nei tur hrim hrina pawh hi a pui danglam vein ka hria a, tha ka ti khawp mai. Chutih rualin, a rawn sawi section 8-na ah hian, ‘University hi sakhua, hnam leh chibing thliarna a awm lova kalpui tur a ni ang’

tih a han sawi te hi Halelujah, Amen ka'n pe deuh a ni, Pu Speaker.

Chutihruual chuan, section 9-ah hian, Chief Minister te chu Chancellor an ni zel ang a, Pro-Chancellor a tan Higher & Technical Education Minister kan han nei chho tur te hi a challenging riauin ka hria a ni.

Tin, ka hma a sawitu khan a chhiar kim loh deuh nia ka hriat hi ka sawisak duh a. Section 32-na – “Commission of Service and Employees’ tihah khan, “University hnathawktute hi University in a la ang a, thawktu leh University inkar-ah intihthiamlohna a awm a nih chuan, Tribunal of Arbitration in a chingfel ang a. Tribunal thuchhuak hi thutawp a ni ang” tih te a awm a, a felfai riauin ka hria a. Tin, section 33-na ah khan, “student leh thawktute’n an lungawi lohna an thlenna tur Disciplinary Action Committee din a ni dawn a ni” tih te kha tarlan a lo ni zel a, a tha ka ti hle mai a.

Tin, section 37-a “University hnuaiia thawktute lakah action na zawnga lak a ni lo ang” tih te hi, a ZPM Policy lo viau nain, tha ka ti khawp mai a. An thil tihsuala kha thatna lai a awm a nih pawhin, ngaihdam an nih tur thu te kha, ‘a MNF Policy mang e’ ka ti a, a lawmawm ka ti hle a ni.

Tin, section 41-ah khan ‘University din laia Mizoram University hnuaiia lo zir mekte pawh Mizoram University ah an duh a nih chuan, Exam pek phal a ni ang’ tih te kha a awm a, a tha ka ti hle mai a. Tin, ‘University dan hrang hrang - ordinance leh regulation te Mizoram State Legislature ah pharh a ni ang a, legislature hian an dan siamte chu an hnawl emaw, an lo modify thei ang’ tih a’n chuang te pawh hi, keini tan zuk inrawlh ve theihna te kha a lo awm ta zel a, a lawmawm a ni.

Ka lawmna ber zawka chu, college din belh te kan ti hlei thei tawh lovin ka hria a. Kan House Leader-in aw puam deuh tel-tawla a lo tiam tawh, sawlai Thenzawl-a college dinna tur te kha Pu Speaker, a inhawngin kan hria a ni. Hma a lo lakna kha malsawmna ah a lo chang turah kan ngai deuh a. Chuvang chuan, wawiinnia kan bill hi ka thlawp a, a bill puluttu pawh hi ka fak a ni.

Champhai North bialtu zahawmtak ina a sawi te pawh kha, tihdanglam theih a nih chuan, Thenzawl-ah te University va din ila, a tha awm mang e aw! College chauh nilo, a university din te hi kan House Leader hian inthlan leh hian han intiam sela, tih te kha rawtna a ni.

Tichuan, he, “The Mizoram State University Bill, 2025” hi thinlung takin ka thlawp a ni. Ka lawm e.

SPEAKER : A lawmawm e. Tunah chuan Member zahawmtak Prof. Lalnilawma i lo sawm ang.

PROF. LALNILAWMA, MINISTER: Pu Speaker, ka lawm e. Wawiina “The Mizoram State University Bill, 2025” kan han sawiho hi a ropui ka ti a, hetiang rawn chhawpchuaktu kan Higher Education changtu Minister chungah lawmthu ka sawi a. Tun sorkar-ah hian portfolio kan hotute’n an rawn pek hrang hrangah hian tuna kan Higher leh School Education changtu Minister Pu Mathlante-a hi, ani bak hi hemi deptt. changtu atana ruat tur hi kan awm chuang dawn em ni le? ka ti a, aniin hma a rawn hruai hi lawmawm ka ti khawp mai.

He NEP 2020 hi central lamin a rawn pass rual khan Mizoram-ah pawh ngaihtuahna kan seng chho nghal a, ram pumina ke a rawn pen ruala kan State-in a rawn pen chho ve zel te pawh hi a ropui lai chu a ni a. Heta sawiho theia ka awm ve hi vannei ka inti a. Nakinah chuan kan zavai hian, “House zahawm taka kan thut ve laiin, he bill hi a pass tute zinga tel kan ni”, tiin kan la sawi ngei ka ring a, a ropui ka ti a.

Chutah chuan, NEP 2020-ina a tum ber chu, mihring, mihringa siam a ni. Graduate tam tak hi ‘mihring ang lo hret te pawh hian a awm ve theih tho’ tih laia hi kan experience ah te pawh hian a awm thei tho a, kan hmu thin tho a ni. Amaherawhchu, tuna 2020-ina a tum bera chu, mihring dik taka chherchhoh hi a ni a. Chutah chuan technical skills te, life skills te a tel a ni. Hemi chungchanga a hma latu pawlah te ka lo tang ve tawh a, Mizoram University atangin he NEP-2020 hi college zawng zawnga implement tura buaipuitu tur Nodal Officer-a ruat ka ni a. Tuna kan curriculum and credit frame-work college atana kan hman mek pawh hi a duangtu zingah kan tel pha ve a, chung atanga ka experience tlemte han tarlan ve ka duh a. A bill content-a hi chu ka rawn sawi lutuk lo ang a. he University hi a phurawmna chhan tlemte rawn tarlan ve ka duh a ni, Pu Speaker.

Tichuan, hemi NEP 2020-ina a tum zinga pakhat chu - dropped-out rate tih tlem a ni. Entirnan: - mi tuin emaw a zirlaiin sum leh pai ah harsatna a lo nei ta a, a harsatna avanga a chawlh chuan, chawlh hlen a ngai tihna a ni a. Tuna NEP-2020-ah hi chuan flexibility – “kum khat a zira a chawlh vang vang hnu ah, a duh hunah a rawn zawm leh thei ang” tih te kha a awm ta a ni. Chu chu, ‘kum 7 chhunga degree course a zawh khan a chawl ang a, a rawn lut leh ang’ ti ang khan, flexibility te pawh kha a awm a ni.

Tichuan, flexibility dang a awm leh a. University pakhat a zirlai khan, University dangah pawh a va insawn thei tho a ni. Chutiang bawh chuan, University danga a zirlai pawh khan, kan University-ah a rawn inzir thei tho ta a ni. Tin, hetah pawh hian flexibility dang awm leh thei chu, offline-a kan zir theih lai khan, online te pawhin a zir theih dawn a, kan duh duh kha kan thlang thei dawn a ni. Chutiang chuan, NEP-2020 hian flexibility tha deuh mai a rawn siam a, khang te kha tinzawnin university te kan han nei thei dawn a ni a. University kan neih chuan, khang atan te pawh khan ruahmanna kan siamthei dawn a ni.

Tichuan, semester system hi a rawn ngaipawimawh em em a, semester system chuan tunah pawh kan kal chho mek a ni a. Amaherawhchu, tun dinhmunah chuan old semester-ah chauh admission kan ti thei a ni. Ka suangtuahnaa Pu Speaker, University kan neih chuan, semester tinah khan admission kan nei thei dawn a, chutah chuan kan hun paih kha a tlem dawn ta a ni. Student-te remchan danin semester tinah admission kan la neih theih chuan, university hi kan tangkaipui dawn a ni. Ram changkang-ah chuan chutiang chuan an kal vek tawh a ni.

Tichuan, Skill a hian hi tawitea han sawi ka duh chu, a sorkar deptt. ang zawng pawhin kan tan ho a ngai hle dawn niin ka hria a. Agriculture sector-ah skill hrang hrang kan nei thei ta a, khang ho leh University-a kan course hote, a skill bikah hian Agriculture Deptt. te Horticulture Deptt. te, Veterinary deptt. hote nena kan tan ho chuan kan nei thei ang a. Tikhan a deptt. tin kha field-ah te pawh khan kan la titheih dawn niin a lang a, a phurawm khawpin ka hria a ni.

Chutih laiin, ITI-a kan course ho pawh hi heng college-ah leh post graduate-ah kan course-te

nen pawh hian kan la ti ho thei dawn a. NSQF level hrang hrang kan neih chuan, a skill-a kha kan hmang tangkai thei dawn a. Chutianga University kan neih chuan, kha kha kan tangkaipui turte a ni ta a ni. Tichuan, a faculty-te pawh college zirtirtu mai ni tawh lovin, University zirtirtu kan nih chuan keimahniah phurna te pawh a awm ang a, kan in upgrade ang a, tha takin quality education kan pe thei dawn a ni.

Chutihualin, kan sawi tawh ang khan quality education kan ngaih pawimawh ber pakhat a ni a, hetah hian NEP 2020-a a sawi len ber zinga pakhat chu -Internationalization hi a ni, Pu Speaker. “Internationalization”, kan tih chu, ramdang University-te nen pawh a thawhhona kha a awm ta a ni. University changkang tak tak ten hetah University kan neih chuan kan University-ah Campus an rawn din thei ang. Chutiang bawkin keini pawhin University dangah campus kan din thei ang a, kan thawkho ang a. Chutiang anih loh pawhin kan university students te khan kan course, semester khat kan la ang a, semester dang chu university dangah; tikhan in exchange theihna programme te kha a awm a, hei hian University neih hi min tichak leh zual a ni. Hetiang thil tha tak tur duan a nih hi a lawmawm ka ti a, chuvangin, he University Bill hi a mimal tak pawhin, kan Minister chungah lawmthu sawi pahin ka rawn thlawp a ni. Pu Speaker, ka lawm e.

SPEAKER : Le, Member zahawmtak, Pi Prova Chakma i lo sawm ang.

PI PROVA CHAKMA: Pu Speaker, ka lawm e. A hmasa in he bill, kan Minister zahawmtak ina a rawn put luh, “The Mizoram State University Bill, 2025” hi a lawmawm ka ti a. A bu ah hian a inziah felfai thlap avangin, engmah hi ka chhiar chhuak lo ang a. Mahse, thil pakhat ka lawmna em em chu, he bill kaltlang hian college din tur te a rawn sawi a, college piah lamah higher secondary te pawh kha a rawn din dawn a. Keini biala higher secondary school pakhat kan neihchhun ah pawh hian eng eng emaw neih loh kan la ngah em em a ni. Chuvang chuan, he “Mizoram State University Bill” hi beiseina sang tak neiin ka pawmpui a, ka thlawp bawk a ni. Ka lawm e.

SPEAKER : A lawmawm e. Tunah Member zahawmtak, Lt. Col. Clement Lalhmingthanga i lo sawm ang.

LT. COL. CLEMENT LALHMINGTHANGA: Pu Speaker ka lawm e. Hei vawiin niah, “The Mizoram State University Bill, 2025” sawi ho tura chance ka nei ve hi ka lawm khawp mai. Tin, he bill pass a tulna chu, tuna kan hriat ang khan National Education Policy, 2020-in a rawn ken tel hrim hrim niin, tuna affiliated college ho zawng zawng pawh he policy hian rawn tihtawp a tum a ni a, a target year 2035-ah chuan heng zawng zawng hi tihtawp vek tawh tur tih policy a rawn kalpui a ni. Chuvangin, hei hi keini pawhina kan follow ngei ngei tur thil a ni bawk a ni. Chutih rualin, he bill hi presentation felfai tak leh chiang tak maia rawn puluttu, a changtu Minister, Dr. Vanlalhlana chungah pawh lawmthu ka sawi a.

Tichuan, he bill bu ah hian a rawn sawi chiang viau tawh a, chung zingah chuan Multi-Disciplinary Education Institution rawn din tur a ni mai a. Tin, tuna existing colleges kan neih ho zingah Pachhunga University College bak hi chu affiliated vek annih avangin, NEP-2020 khan a rawn ban vek tawh dawn a nih hmel si a. Chuvangin, keini pawh lo inrinlawkna atan helaiia State University kan lo neih hi chu kan tihmakmawh a ni a. Chuta kan tihtheiha chu - cluster system, existing college hrang hrang lo cluster mai kha a ni a.

Chungah chuan, multi-disciplinary education system, skill development lam, tuna kan neihlai mekah te hian conventional taka subject kan neih hrang hrang ho bakah over-all growth students ho tana thanlenna tur lam arts te, skill lam te, music industry lam te leh skill chi hrang hrang develop-na tur atana khang subject ho kha a rawn ken tel dawn avangin, hei hi chu thil pawimawh em em mai, Mizoram State pawhin kan mamawh, kan thalaite khaiding tura pawimawh em em a ni dawn niin a lang a.

Nichinah Pu Laltea kha a rawn ding tawh a. Ani nen hian Champhai kan bial ve ve a, heng development leh thil thar rawn kala hi kan bial lam tan khian kan lo rualawt thin em em mai a. Tin, nichina a rawn sawi ang deuh khan, he a headquarters dinna tura hi Aizawl ani a. Amaherawhchu, keiniin kan lo itna chhan chu, Champhai ka bial chhungah ngei pawh khian Polytechnic building bakah accommodation chi hrang -classroom leh engkim mai peihsa diam a awm a. Khingte khi tangkai taka chhawr theih nan kan lo it khawp mai a, 'chung atan chuan a tha dawn mang e' tia kan lo thlir a ni a, kan lo mitthla ve a ni.

Amaherawhchu, tuna kan han hriat leh khan, cluster system anih dawn avang khan helai hi headquarters awmna tur hmun ani a. Amaherawhchu, heng discipline (subject) chi hrang hrangte khang college-ah entirnan: humanity education ah - English, mizo, education leh hindi subject ang te tana institution kha a hranpa a awma, tin social science lam - political science, sociology, psychology, history, geography ang ho hi institution hrana din tura duan a nih hmel a. Khatiang anih dawn chuan, tunah Aizawl mi ngeite pawh kha Champhai college-ah khang subject te kha an zir dawn chuan an rawn kal tho kha a ngai ve dawn a. Khatiang deuh khan, tuna MZU ang deuha lianpui hmunkhata din tur emaw tia kan lo mitthla nen chuan a in ang chiah lo a nih hmel a.

Chutiang anih avang chuan, helai kan State Capital Aizawl-a dah tura ruahmanna te a lo awm anih hmel a. Chuvangin, vawiina kan bill, Mizoram State University Bill, 2025 hi keipawhin lawm takin ka pawmpui a ni e. Pu Speaker, ka lawm e.

SPEAKER : A lawmawm e. Tunah chuan, Member zahawm tak Er. H. Lalzirliana ilo sawm ang.

PU H. LALZIRLIANA: Pu Speaker, ka lawm e. Vawiinah bill pawimawh tak "Mizoram University Bill 2025" tih sawi ve theia ka awm hi ka lawm hle a. Niminah chhungkaw lam vanduinah avangin ka rawn tel thei lova pawl ka ti hle a. Hei vawiina kan bill hi NEP-2020 behchhana siam a ni a. 'A tulnain min nawrthluk avanga rawn piang chhuak a ni' ti ila, a sual tampui awm lo e.

'Education is the backbone of development' an lo tih angin, India Independence kan hmuh hnu 1948 atang khan 'University Education Commission' tih te, 'Secondary Education Commission' tih te, 'Education Commission, 1964-1966' te, 'National Policy on Education (NPE) 1968' te, 'National Policy on Education 1986, Dr. TSR Subramanian Committee Report 2016', te, 'Dr. K. Kasturirangan Committee Report May 2019' te leh 'National Education Policy 2020' tih vawiina kan lo neih hi a ni ta a. Chu chuan National Policy on Education, 1986 kha a rawn luahlan ta a ni. Vawiina kan bill hi 'sorkar tharah rawn hawn kan rawn tum ang' tih kha, bialtu te kha ka rawn hrilh duh a. Kan inzawhna ber chu - hna han zawn tak tak chuan 'khawi University chhuak nge?' tih hi a ni duh khawp mai; eng level-ah pawh hna han zawng ila, DU tih te, JNU tih te, Symbiosis tih te. Keini

kan pass chhuahna ngei NEHU Institute pawh kha tunah chuan ‘Deemed University’ a lo ni tawh a, amaha certificate pe thei university a lo ni tawh a.

Chuvang chuan, NEP 2020 hian min insist avang te leh, hemi ina a thil tum ber mai Multi-Disciplinary Institute 2030-2035 chho-a din tur tih te. Kan hriat ang khan tuna MZU, kan Central University neih bera khu research institute a nih tawh dawn avangin, helaia ‘affiliated colleges’ kan tih hi tunah hian Mizoram-ah 22 bawr vel a awm a, chungte chu a theih vek tawh dawn si loh avangin, kan neih ngei ngei chu a lo ngai ta a. Chutiang karah chuan a quality erawh hi chu kan ngaih pawimawh fo a dawnin kan hria a. State dang University nei tawh reng reng hian an Chancellor-ah hian hei point number 9-ah hian Head of University-ah hian Chief Minister hi Chancellor ani anga ati a, kan hmuh theih chinah chuan India ramah hian West Bengal chiah hian Chief Minister hi Chancellor-ah an la nei a. Chu chu Bill a an pass vang a ni a, State dang zawng zawng hi chuan Governor hi Chancellor-a an neih vek a ni.

Kan han sawi ang khan, kan hun lo kal leh zel turah kan University te quality zawka kan chhuah theihna turin, politics rawngkai lo hi nithei sela, mi state kalpui ang te hian kalpui ve zawk ta ila a tha zawk ang em aw, tih te rilruah ka lo nei ve mai mai a, heti lai hi ennawn atan a tha awm mang e te ka ti a.

Tunah hian Mizoram ah University pathum kan nei a, Mizoram University (Central University) a ni a, ICAI University te, National of Institute of Technology te hi ‘Deemed University’ kan tih ang kha a ni a. Tichuan, ‘affiliated colleges’ kan tih ho hi 22 bawr vel kan nei bawk a. Heng ho a tam zawkte hi chu Mizoram State University hnuaiia affiliate tur an nih tawh hmel a ni.

Eng pawh ni sela, State University hi NEP-2020 hian, mandatory a nilo a ti a, amaherawhchu, a encourage thung a ni. University State tina a enkawl hi a encourage a ni. A chhan chu, higher education excess a awl zawk nan te, regional development a awm theih nan te leh quality and excellence zirna a awm theih nan te tiin, State tin te hian an nei hi chu a insist, a encourage a ni. Amaherawhchu, mandatory a ni lo a ti a ni.

Vawiina kan bill hi a pawimawh a, a la famkim tawh loh te pawh ring ila. Kan Minister zahawm takin a tawpah a rawn sawifiah ngei se, a tulna chhan leh a tangkai dan tur leh a pawimawhna te pawh. Tichuan, vawiin niah hian he bill pawimawh tak hi pass ngei turin ka thlawp a ni e. Pu Speaker, ka lawm e.

SPEAKER : Tunah chuan, Pu V. Malsawmtluanga ilo sawm ang.

PU V. MALSAWMTLUANGA: Pu Speaker, ka lawm e. Kan tlar hi member zahawm tak Pu Muanpuia hian min influence deuh niin a lang a. Hei, tuna ka puan rawn bah hi Paihte-Hnam Puan a ni, tih ka rawn sawi hmasa ve a ni.

Vawiinah “The Mizoram State University Bill, 2025”, bill tha tak, kan Minister chak takin a rawn pulut hi a lawmawm hlein ka hria a. A hmasa lama member lo ding tawh te pawhin an sawi tawh tho a, he bill putluhna leh pass-na tura he House zahawm takah Pathian leh bial mipuite zara ka’n han ding ve thei hrim hrim pawh hi ka vannei hlein ka hria a. Engtik niah emaw chuan ‘heng bill pass-naa a thlawptute zingah ka ding ve a ni’ tih te pawh, kan

ti-ti leh thawnthua a chang hun te a la awm ang a, chumi hunah te pawh chuan kan la inchhuan vena tur a ni te pawhin ka hria a.

Chutih rual erawh chuan, a tir tea kan lo hriat dan ang, tlema fuh lo deuh kha a awm a. Sawi ang deuhin Chhim lamah 'MZU - Southern Campus' nei turin sorkar hmasain hmalak tumna te a lo nei tawh a. Khatiang deuh khan college hmunkhatah building ropui tak tak, development lian tak tak rawn kal tura ngaihna chen te kha a awm a, chungte chu mipuite leh NGO pawl hrang hrangte pawhin kan hriat dan a ni.

Amaherawhchu, kan Minister-in a rawn sawifiah tawh a, mumal taka kan sum dinhmun te thlira cluster college kalpui dan tur te a rawn duang a ni a, a lawmawm hle in ka hria a. Chutih rual erawh chuan, khang mumal taka mipuiten kan lo hriat tawk lohna avang te leh, zep thu a awm lova, pressure neuh neuh te bakah ka MLA puite pawhin an hre tho a, an lo dawng ve tawh kha a ni a. Kan Minister ho hian mumal takin min kokhawmin kan lo sawiho tawh a. Kha, a sawi zeuh tawh a, 'Look Champhai' tih te ka bula mite hian an sawi tawh a, khatiang zawnga kan tih dawn chuan kan Dy. Speaker pawh hi rawn ding ve thei se, Kolasib lama dah te kha a rawn rawt ve maithei a. Chutiang te chu a ni a. Engpawh chu ni se, kan ram tana tha tur hetiang bill kan han pass tur hi lawmawm hlein ka hria a ni.

Tin, Pu Speaker i veilama thute atang pawhin an thlawp thu hlir kan ngaithla te kha a lawmawm leh zual a ni. Kan hriat theuh angin, zirna chuan mimawlte min tifing a, mifingte finna leh thiamna te a haichhuah belh a; tin, mihring puitlinga min siamtu a ni a. Chumi kal zel leh he khawvel changkanna mila education system tha zawk kan neih theihna turin NEP-2020 duanchhuah a lo ni ta a. He bill kaltlang hian he NEP-2020 te hi zawm chhoh tum a lo ni a.

A lawmawm ka tih em em chhan chu - keini State harsa leh zual tak, sorkarin leiba tam tak chhawmin hetiang hian ke kan pen ve mek a ni a. Hetiang bill kaltlanga hma kan la chho a nih chuan (kha, kan ngaithla tawh a), crore 100 chuang te kan dawng thei dawn ni te pawhin a lang a, a lawmawm hlein ka hria a ni.

Tin, thil lawmawm leh em em, he bill in a tinzawn chu, State dang hnuaia kan college-te awm lo tura, keimahni, 'kan State hming ngei' ti mai teh ang, keimahni kutkawih ngeia college te, university te a han awm tur hi a lawmawm hlein ka hria a. Tin, cluster college kalpui tur hian district hrang hranga college-te, hun lo awm zel tura hmasawna tur a keng tel Chiang hlein ka hria a ni. Tin, NEP-2020 kal chhohpuina tur kawngah quality education te, vocational course te, technology development centre te; tin, tunlai thangthar zawkte leh ka thalaipuite pawhin kan mamawh em em leh zirlaite pawhin kan mamawh a ni a, heng kalpui tur a ni te hi lawmawm ka ti a ni. Tin, he bill-a kan hmuh, kalphung thar, mipui-sorkar kan nihnain a ken tel, langtlang sorkar lanchhuahna tur Annual Accounts and Returns mumal taka kumtin report a awm tur te hi a lawmawm hlein ka hre bawk a ni.

Pu Speaker, a tawp berah chuan, kan member duhawm tak khan, 'private school ah kan fate kan dah lo a ni' a tih kha, a ni khawp mai a. Lunglei-pa ka ni a, fa chu ka la nei lo a, Lunglei atangin a ti theite'n Aizawl ah emaw, Aizawl atangin phaiah, phai atangin foreign ah an fate an indah ve leh thin a ni a. Amaherawhchu, heng kan bill leh tuna sorkar Pu Lalduhoma kaihhruai sorkar leh ZPM Policy te ka han han thlir hian leh, kan kalphung ka han thlir hian, Pathian leh mipui zarah kum a liam ang a, private school ni lovin heng

sorkar school leh college-ah te hian kan la inluh siak ang a, ‘hengte hi kan la bawh rawn dawn a ni’ tih te kha a tawpna atan ka sawi duh a ni.

Aw le, “The Mizoram State University Bill, 2025” hi a tha ka ti a, lawm takin ka support a ni e. Ka lawm e.

(Speech not corrected.)

SPEAKER : A lawmawm e. Tunah chuan, Member zahawm tak Pu Lalmuanpuia Punte i lo sawm ang.

PU LALMUANPUIA PUNTE: Pu Speaker, ka lawm e. Vawiinah hian he bill, a Act tak hi chu ka luhchilh vak dawn lova, sawi tam vak pawh ngai lovin kan thlawp tlang viau niin a lang a. Pu Speaker thuhma ka’n neih duh chu - I veilama mite hian an pawl kalphung leh movement an hrechiang lo riauin ka hria a. Dampa bialtu zahawm tak Pu Rintluanga khan hei hi ramhnuai atanga an rawn hawn ang deuhthaw khan a sawi a, kan University hi. MNF chuan, ‘University of its own’ tih, Pu Laldenga’n a rawn hawn kha ‘central a ni lo’ tiin, a an duh lo a ni. Congress sorkar khan State University siam an tum a, khatih lai khan Pu Zoramthanga kha Chief Minister a la nih hma kha a ni a. Shillong Mizo Students Union kha an mangang khawp mai a, Pu Zoramthanga zin kha Shillong Mizoram House ah an lo hmuak a, opposition annih avangin a lo oppose ve ngei ringin, a an va kawm a. Ani chuan, ‘I don’t like anything Central’ a ti a ni. Central University kha a duh lo a ni. Chu chu, an hawn anga a han sawi mai kha, ‘a ni lo a ni’ tih kha kan sawi duh a.

Tunah hian NEP-2020 avangin anmahni party sorkar lai ngeia State University an lo duansa kan han chhonzawm tur hi, anmahni kutkawih anga sawi tur an nih viau lai khan, barh luh angin an sawi leh tlat mai si a, an bangbo ang reng khan ka hria a. High Court rawn ang tea insawi phei kha chu; tun thlengin High Court kan la nei lova, Guwahati High Court, Mizoram Bench chauh a la ni a. Chuvang chuan, khang te kha ka sawi duh mai mai a. Tuna mi zawka hi an sorkar laia an duansa kan han chhonzawm a ni a. ‘Keimahni kutkawih’ tia lawm tak zawk awm, ‘ramhnuai atanga kan mitthla kha a ni a’ ti tur awm zawk kha, barh luh angin a’n sawi ta tlat maia kha.

Tin, inthlan dawn laia tawngkam te han sawi chhuah takah chuan, Tuirial College te pawh kha an din lo tluan chu a ni a. Tin, Pu Speaker, chancellor atana Chief Minister ruat a ni kha an helh deuh niin a lang a. ZPM hi min sorkar tir rei viau an tum niin ka hria a, an huphurh deuh niin a hriat a. Nakinah chuan kan Opp. Leader pawh a la CM ve ang a, anni ve leh mai dawn a lawm; ‘hun hi a inthlak zel a lawm’ tih kha ka’n sawi duh a. Tin, Tamil Nadu te, West Bengal-ah te pawh Chief Minister hi chancellor tho an ni.

Tin, a hmun chungchang a rawn rik hlim khan Lunglei leh Champhai lam khan pro-fight an lo nei hman hman lek lek kha a lo ni a, keini an ruling puite pawhin kan lo hriat vak loh khan. Nichina an han sawi tak ang khan, ‘State University’ kan han tih khan, khulai university kan lo neih tawh ang khan hmun hma lianpui a rawn inlung khup nghal tur kan mitthla nghal avang khan, khatianga kan han inchuh pawh kha a awm viau a ni.

Amaherawchu, tuna kan han tih tum dan erawh chu, India ah chuan J&K hi State University nei changtlung pawl a ni a. Mizoram sorkar aiawha kan zin tum pawhin tuna kan tih ang deuh vel tho hian a ni a. Chuvang chuan, kan lo inchuh lawka kha khatiang lutuk a lo nih

leh tak loh ah chuan, chuti takin pawh boruak an nei zui lo turah ngai ilangin. Kei pawh hi Aizawl centric duh miah lo ka ni a, engkim Aizawl-a dah ringawt duhlotu ka ni. Hemi boruak ka hriat hlim pawhin, ‘Lunglei ah dah tur a ni’, titu ka ni. Amaherawhchu, (a changtu minister-in lo ngaithiam sela), MZU kan zu mitthla ang em em a nih loh avangin, university kan neih tan tirh lai khan Chaltlang ah Administrative Block a awm a, class room thenkhat awm bawk a, then khat chanmari-ah. Lo nei dawn ta pawh ni ila, registrar building pahnih-pathum vel chu lo awm thar a awm ang a, a bak chu college ding lai te hi rin vek tur tho a nih avangin, han inchuh tur kha a awm lem lo niin a lang a. Chuvang chuan, khalai kha buaina tur a awm vak lo a ni.

Pu Speaker, He University bill hi tlang ngei se ka duh a, ka thlawp a ni e.

(Speech not corrected.)

SPEAKER : Member zahawm tak Dr. Lorrain Lalpekliaana ilo sawm ang.

DR. LORRAIN LALPEKLIANA CHINZAH: Pu Speaker, ka lawm e. “The Mizoram State University Bill, 2025” Higher & Technical Education Minister-in a rawn pulut hi lawmawm ka ti a. Hei hi Mizoram-in zirna lamah bung thar a kaina tura thil pawimawh tak a niin ka hria.

‘Kan sorkar-in zirna a ngaimawipawh a ni’ tih he bill atang hian a chiang hlein ka hria. Tuna Mizoram-in university (IGFAI lam sawilo ta ila) kan neih hi kan hriat theuh angin, 2001 khan India Parliament pawmpuinaa din a ni a. He university atang hian Mizo zirlai tam takte’n zirna lama hmasawna leh thiamna nasa tak an neih phah a. Tin, kan mithiamte tan job-opportunity tha tak a siam bawk a. Tin, Department of Higher & Technical Education data-a a lan danin, Mizoram sorkar hnuaiah higher education Institution 26 kan nei mek a. Amaherawhchu, private lam sawi lohin, university pakhat chiah kan nei a ni.

Pu Speaker, data atanga a lan danin, tun dinhmunah Mizoram University ah hian post-graduate zirna seat 1000-1200 vel awm nia hriat a ni a. Tin, college hrang hranga kan seat neih zat leh Mizoram University-a kan seat neih zat te han compare hian college hrang hrang atanga zirlai pass chhuak 70-80% te hian kan university ah tun dinhmunah chuan seat an chang lo a ni.

Tin, zirna hautak chho zel karah Mizoram University din tumna kan sorkar hmalaknaa a lo awm hi Pu Speaker, lawmawm ka ti a. State University din a lo nih theih chuan, nichina kan sawi tak kan zirlaite harsatna kha nasa takin a sutkian ka beisei a ni.

Tin, research lam bei duh tan kawng a lo awlsam phah zawk ang a, Ph. D leh post-doctor studies ti duh tan kawng zau zawk a lo inhawng tur hi lawmawm ka ti a. Kan mithiam thalaite tan job-opportunities leh kan sorkar tan pawh employment generation opportunities a siam bawk tur hi thil lawmawm tak a niin ka hria.

Pu Speaker, he bill atanga a lan danin, kan hotute hian ngaihtuahna nasa tak an seng a, option hrang hrangte pawh an dap kual nasain a lang a. Chung zingah chuan, kan state economy in a zawh tawh tur leh National Education Policy, 2020 zul zuiin tuna Mizoram-a kan college te hi constituent college an ni tawh dawn a. Tin, research pulling method lam hawi adapt tura ruahman niin a lang a. Kan college awmsa te hi siam rema, a tul anga pawh

khawm leh establishment thar siam chhoh te hi he bill hian a tum niin a lang a. NEP, 2020 in a tarlan tuna India rama kan practice mek affiliation system tih tawp a nih thuai dawn avanga kan college tam takte dinhmun derthawnga awm mai tur chhanhimna a nih piah lamah, kan zirlaite hma khua ngaihtuahin ruahmanna tha tak a ni bawkin ka hria a ni.

Pu Speaker, tun dinhmunah hian India ramah State University 459 vel a awm a, North East bikah 17 a awm bawk a. Keini pawhin State University kan din thei a nih chuan, kan hmalam hun chu a eng chho dawn hlein ka hria.

Pu Speaker, a tawp berah chuan, he bill-a kan hmuh angin, Mizoram State University kan din thei a nih chuan, a neitu (ownership) nihna Mizoram sorkar kutah a awm ang a, Chief Minister chu state-a thuneitu sang ber Chancellor a ni dawn a. University inrelbawl danah te, thuneitu appoint danah te, thawktu lak danah te, zirlai admission kan kalpui danah te, a ram lei lung fate duhsakna kawngah te leh thildang tam takah keimahni ngeiin thuneihna kan neih tawh dawn avangin, State University din hi kan ram tan thil hlu tak leh pawimawh tak a ni.

Pu Speaker, Mizoram University din hi kan ram leh kan hnam tam thil tha, zirna kawnga hmasawna rahbi thar anih dawn avangin, “The Mizoram University Bill, 2025” hi lawm takin ka thlawp e. Ka lawm e.

(Speech not corrected.)

SPEAKER : A lawmawm e. Tunah chuan, Dr. K. Beichhua, Member zahawm tak ilo sawm ang.

DR. K. BEICHHUA: Pu Speaker, ka lawm e. Vawiina kan bill discuss mek hi bill tha tak a niin kan hria a. Khawvel hi education-ah nasa takin kan intlansiak a, chutiang chuan India ram ngei pawh hi education-ah hian khawvelah chhuanawm tak a ni ti ila kan tihsual ka ring lova. Chutiang chuan an kal chho zel a, keini tan pawh khawvel mi-changkang leh mi-thiam kan tihte hi kan el ve theihna awmchhun chu, education hi a ni. Hei hi kan rilruah nei tlat ilangin a thain ka hria.

Chutiang chuan India pawhin he education pawimawhna hriatchianna atangin he NEP-2020 te pawh hi duan a lo ni a. Chutiang zultui chuan tunah hian kan kal chho a, keini Mizoram pawh NEP-2020 anga kal tur kan nih angin kan kal chho tan a. National Education Policy zul zuiin kan Mizoram University pawh Central University a ni ang a, kum 2035-ah Research Intensive University a convert a lo ni dawn ta a ni. Tun dinhmunah pawh University MZU kan neiha department hrang hrangte a limit em em a, chungah chuan harsatna tam tak kan tawk a. Kan thalai zirna sang bei chho zel turte tan pawn harsatna tam tak kan tawk a ni. Chutiang laia tuna University kan neiha tur bill lo lut hi a tha ka ti a, hei hian college zawng zawng constituent college-in, State University a ni dawn a ni. Chutiang a nih chuan hmasawna tam tak pawh kan hmuh belh a rinawm a, chu chu he bill rawn luh chhan ber pawh a niin ka hria a.

Pu Speaker, section 2, definition-ah hian, ‘Vice Principal’ tih a tel lova, kan hriatna kha a hlui ve ta deuh nge ni dawn ni. College thenkhatah chuan college vice principal te hi an la awmin ka hria a, ka hriatsual loh chuan. Hei hi ‘engvanga dah tel lo nge kan nih’ tih lai kha nakinah a changtu Minister-in min hrilhfhiah turah ngai ta ila. Tin, tuna kan kal ang hian lo kal ta ni ila, tuna Vice Principal te hi eng level-a dah tur nge ni ang, tih lai te kha;

kan neih a ngai lo kan ti te pawh a ni maithei bawk a. Chutiang chuan Pu Speaker, UGC regulation angin he State University hi a kal dawn a ni a. Tuna Central University anga zirtirtute heng keimahni zingah te pawh hian kan awm thin a, an zirtirtu hna kalsan si lova politics a zuan luh hi tun kan bill putluh kan sawi mek ah hian thil theih a ni ve dawn em, tih lai te pawh hi min han hrilhfhah se a thain ka hria a. Tin, Pu Speaker, opposition ka nihna angin, Section 26 (10)-ah khan University tih spelling kha a dik lo, kha kha constructive takin lo ti dik ula tih thurawn ka pe che u a ni.

Tichuan, vawiina bill kan han sawiho hian kan rilru a lo lang hmasa ber chu, kan harsatna sum leh pai te, infrastructure-a kan harsatna te a rawn lang hmasa berin ka ring a. Hengah hian thil-harsa a nih tih avanga sut tlang tum lova lo pending emaw, avoid emaw tumna hi ram hrulaitute kan tih tur a ni lo a ni, tih te rilruah nei ila. ‘Kan suttlang a pawimawh, ram cause atan’ tih rilru nei ta ila. Tin, he bill-ah hian political party rilru – ‘in party, kan party’ tia lo inhniaalna chi pawh niin ka hre lova, ram mipui tana thil tha a nih chuan, kan zavaia kan tanrual a pawimawh hlein ka hre bawk a.

Tin, a hmun turah pawh kei ka duh dan chuan, Siaha-ah ni se a tha ka ti a; mahse, ‘Aizawl centric’ tih te kha a lo ri ta a, Aizawl khawpui ah hian engkim hi a tawt tawh avangin, Aizawl hi chhanchhuah a ngai tawh tak zet zet a ni, Pu Speaker. Kan tawt tawh lutuk. A hmun hma leh kan traffic te pawh hi han en ta ila, hetiang khawpui piangsual tawh hi ‘engtinnge kan chhanchhuah theih ang’ tih hi kan rilru ah awm se. Tin, Mizoram-a hmun laili ber (chhim tawp atang leh a hmar tawp atang pawhin). Tunlaih hei, national highway te pawh an han zo ang a, airport atangin Lunglei saw a hla miah lo a ni. Chuvang chuan, a hmun atan chuan Lunglei hi a fuh ber lo ang maw? Kei chuan Zoram pumpui ngaihtuahin a tul ka ti a ni. Chuvang chuan, a hmunah Lunglei ni se a thain ka hria a ni.

Pu Speaker, he bill hi a tha ka ti a, ka support a ni e. Ka lawm e.

SPEAKER : A lawmawm e. Tunah chuan, Member zahawm tak Pu C. Ngunlianbunga ilo sawm ang.

PU C. NGUNLIANCHUNGA: Pu Speaker, ka lawm e. ‘The Mizoram State University Bill, 2025’ sawina hun ka nei thei a lawmawm ka ti a. He bill hi a concerned Minister-in a rawn sawifiah tawh a. A tir a bill ka lo hmuh khan ‘2035 a mi tur kha a hmanhmawh thlak vak em maw ni le’ ka lo ti a. Mahse, ‘sorkar hmasa atanga lo ruahman leh NEP kalpui a nih avanga hmanhmawh thlak a ni’ tih te kan han hre hnahnawh a. Tin, a chhung thu leh a tangkaina tur chungchang te, Zoram tan hmasawmna rahbi kan rah ve theihna tur te, kan thalai thangthar lo chhuak zel turte eizawmna kawngah mahni thiam thil kawng hrang hrangah ke an lo pen theihna tur a nih thu te kan ngaithla a; a ngaihnaawmin, a nghahhlelhwam ka ti a ni.

Chutih rual chuan Pu Speaker, ka sawi ve duh chu, ka hmaa sawitu Siaha bialtuin a tawpa a sawi ang khan, Hrangturzo bialtu zahawm tak Pu Muanpuia khan he Mizoram University headquarters-a kha chuti teh ual a chhenfakawm em em a ni loh thu te a sawi bawk a. Tin, Champhai North bialtute, a north leh south lam khan an lo inchuh deuh ni awm tak a ni a. (lobby te pawh an lo nei deuh a ni ang), kha lam khan a bial leh constituency zawnga ngaihtuahna hi awm lo se, he kan Zoramah hian ‘hmasawmna kai rual se’ tih hi a pawimawh em em a ni.

Hei, zirna chungchang, abik takin literacy-ah chhim lam, ka bial ngat phei chu kan hnufual em em a. Nimin lama Samagra Siksha chungchunga zawhnaah khan zirtirtute pawh nakina report tur an tih ang khan, kan report ang a, a hminga sikul awm si, wawiinnia zirtirtu nei reng reng si lo, District Council-ah MR pakhat an chhawrin a enkawl ve mai mai sikul tam tak a awm a ni. UPSC-ah te, MPS-ah te, Middle School leh Primary School kan tih angahah te khan school awm mumal lohna a tam em em a, chumi avang chuan lehkhah thiamna kawngah keini Lawngtlai District hi a Mizoram-ah pawh a hnufual ber kan nihna chhan a ni a. Chutihruah chuan, wawiini a kan education kalphungah hian khawpuiah an inbeng tlurh a, a kairual lo hle a ni. He sorkar ah, ‘mipui sorkar kan din dawn e’ tih a ni a, mipui sorkar a lo ding ta a, mipuite hnena an intiam angin ‘chhim lam pawh kan ngaipawimawh a ni’ tih a ni a.

Hei, Mizoram Legislative Assembly hi Pu Speaker, kum 50 a kal tawh a, Cabinet Meeting hi Aizawl-ah bak an la nei ngai lo reng reng a, tun sorkar thar hian chhim lam a ngaipawimawh a, Lunglei-ah sum tam tak sengin inrenchem kumah an va hmang kha a ni a. Tichuan, kan ngaihthlak tak ang khan, Mizoram University te, Pachhunga University te, IGFAI te helai Aizawl khawpuiah an inbeng tun mai a, a headquarters hi Lunglei-ah awm ve sela. Cluster a ni emaw, a enga pawh lo nisela, headquarters kha Lunglei District in a lo chang thei a nih chuan, Mizoram-a kan zirna kawngah headquarters na-na na chu tun kan sorkar hrawn mekah hian kan House Leader zahawm takin a party office-a a thusawi kha ka lo ngaithla ve a, “Minister kher nih a ngai lo; Minister nih avangin engmah hlawkna a awm lo” a ti a. Mahse, kan hotu pakhat, ruling lam MLA chuan, “a diltu nih ai chuan, a petu nih chu inthlau tak a ni” a ti ve thung a. Chutiang deuh chuan, headquarters a kha concerned minister khan a sawi tawh a. “Lengpui Airport atangin, central lam atanga lo entute tan chuan a hnai vai deuh a” a tih khan, ziakin lang lo mahse, headquarters Aizawl an tihna niin a lang ta a.

Mizoram pawh hma kan sawn chho va, kalkawng inkalpawhna chungchang thuah pawh kawngpui te a lo tha tawh a. Tin, nichina kan ngaihthlak ang khan, Look-East Policy a lo awm ang a, tunah a ti ut-ut tawh a; ‘Chhim lam a eng ang a, kawtchhuah pawh a inthleng dawn a ni’ tih te a lo ni bawk nen. Aizawl-ah eng emaw chin a lo awm a, Lunglei ah a lo awm ve khan Mizoram pumpui min cover ang a, Mizoram University a nih ang tak khan, a headquarters pawh Lunglei ah awm se, Zoram hi kan inkhairual deuh ang a. Hei, hun eng emaw chen kan lo kal tawhnaah tute emaw sawi thin ang deuhin, ‘lu lian deuh, ke zuih deuh kan ni ang’ tih hi a hlauhawmin ka hria.

Tuna kan sorkar pawh hi keini Undivided-Chhimtuipui District tan ngat phei chuan a lawmawm viau laiin, a lawmawm lohna – Undivided Chhimtuipui ah MLA constituency panga awmah ZPM pakhat kan tling ve a. Tun hma sorkar lo kal tawhah kha chuann ministry ah kan tel ngei ngei thin a, tun tumah erawh chuan kan tel lo a. Aizawl khawpui chhungah kan inbeng vak mai te pawh hi, a sorkar kalchhohnaah hian Zoram kalsiam hi a rual lo a ni tih hi Pu Speaker, a lang chiangin ka hria a. Chumi avang chuan, Mizoram University headquarters hi Lunglei ah dah ngei thei ila; ‘tichuan, Zoram kalsiam a rem deuh ang’ tiin Pu Speaker, ka han rawt ve a ni e. Ka lawm e.

SPEAKER : A lawmawm e. Sawi tur kan awm tawh loh chuan, kan Opp. Leader in sawi tur a nei em? I lo sawm ang.

PU LALCHHANDAMA RALTE, OPP. LEADER: Pu Speaker, ka lawm e. Vawiinah kan Higher & Technical Education Minister zahawm takin “The Mizoram State University Bill, 2025” House-ah a rawn pulut hi a lawmawm hlein ka hria a. A presentation te pawh kha uluk takin kan ngaithla a, a tizahawm a, a ti-smart thiamin ka hria a. He University Bill lo pian chhuah leh lokalna te sorkar hmasa lama Minister hmasa zawk hming lam meuhin a tobul te a sawi hi a lawmawm hle a. Tin, NEP 2020- in a a phut avanga State lo inbuatsaih lawkna a nih dan te a sawi bawk a, National Education Policy, 2020 kal tlanga State University kan neih a tulna leh lo inruahman a ngaihna te fiah takin min han hrilh a, a lawmawm hle a. Zawhna kan neihte min rawn hrilhfiah nghal deuh sa a.

Chutih rual chuan, vawiin hian uluk taka hriatfiah ka ngaite bakah han zawh duh ka nei a. Kan Statement of Object and Reason (3rd para) ah khan, (Pu Speaker, i remtihain) “In the State of Mizoram, we have only one University”, Mizoram chhungah university pakhat chauh nei ang khan Statement of Object and Reason ah khan a inziak a. Kan hriat angin, Mizoram University (central ta) bakah ICFAI University pawh he Legislative Assembly State Act hnuaiia kan pass a, he University hi kan huam tel lo tihna nge, kha kha? House ngeiin a kan pass a nih avangin, tihsual palh a ni em aw, ka ti a. A dang - heng NIT te kha chu university tih hmingpu chiah lo a nih avangin thudangah kan dah a.

Tin, NEP, 2020 document ah khan direct-a State University din ngei ngei a tul thu kha a awm chiah lo nangin, indirect in para 10.8 ah khan a inziak a; a chhan ah pawh, “affiliation system hi kum 2020 atanga kum 15-na ah tuna University affiliation tlangpui te hi tihtawp tur a nih avangin 2035 ah chuan a tawp dawn a ni” tih anga sawi a ni a.

Tin, a project-ah khan, ‘college pakhat 2000-3000 vel tal zirlai awm thei se’ tih te pawh kha a rawn sawi a. Khalaiia ngaihtuahna kan hman thaa ka hriata chu, affiliated college zawng zawng, heng degree college ang chi te emaw, post-graduate te emaw hi Mizoram University tawp ni vek thei tur anga ngaih theih deuh khan sawi a ni a’ research intensive university anga kal tur anga sawi kha a ni mai a. Pachhunga University College undergraduate leh post-graduate course awmte pawh constituent an nih anga la chhonzawm zel kha a nih a rinawm a. University hnuaiiah khan college degree UG kha pe tawh lo turah khan kan ngai nge, khalai te kha a la awm zel dawn em? Khalai kha kan Ministerin min sawifiah sak a tulin kan ring a.

Tin, kan State University lo piang dawn ta se, tun dinhmunah college hrang hrangte pawhkhawma university bul tan kan tum chho kha a ni a. Vawiinah hian post-graduate course bika hi, M. Ed chu IASE ah kan han pe a, Hrangbana College ah Commerce, Govt. Aizawl College ah Education, Govt. Aizawl West College ah History leh a dang pawh a awm mai thei a. Amaherawh chu, post-graduate course tam zawk kan siam a ngaih dawn piah lamah kan Minister sawi ang khan vocational lam te, traditional subject leh thil dangte pawh uar zawka kalpui kan tum dawn kha chuan, he university kan din tur hi sum leh pai hautak lo thei ang ber kan tum rual hian, loh theih lovin eng emaw zirtitu leh thawktu lak belh te, infrastructural development te pawh a ngai dawn a. Kan State sumpui enkawltu, a bik takin Finance Minister, kan Chief Minister pawh ka ngen duh chu - zirna hi a pawimawh avangin kuminah hian a thu eng emaw han tihfel tur kan nei a nih pawhin, 2026-2027 budget atang chuan Mizoram State University lam pualin a lian deuh hleka ruahmanna kan siam tan loh chuan hun lokal zel turah hian kan ti nek nek ang a, 2035 kan

thleng mai dawn. Chuvang chuan, inbuatsaihna hi nasa zawka kan kala, department dangte ah insum rih a ngai a nih pawhin, loh theih lova kan mamawh tur, kan thalaite zirna sang zawka an kalna tur hi kan hmathlirah hian kan dah pawimawh a tul hlein ka hria ni.

Tin, kan Minister changtuin a a windup huna a rawn chhan atan leh a sawifiah atan tlem han sawi kan duh a.

1) Section 3 (sub-section 3) ah khan, ‘college leh institution bank balance zawng zawng chu university property a ni ang’ tih kha a ni a. Kan college te kha audit affiliation an tih hma khan kan ti vek dawn tihna a ni ang a. Chutah chuan kan college ho te khan Mizoram State University-ah affiliation a tahtawlin an ti turah ka ngai a. Kan University khan a zo mai dawn lova, 2035 thleng kha hun nei tur kan nih avang khan. Khang ah khan kan college-te kha regional-wise in nge kan kalpui dawn, multi-disciplinary angin? College-te State University zawm tura kan siam dan tura kha, eng ang ruahmanna nge kan neih dawn, tih kha ka hrechiang duh a.

2) Tin, constituent college tih te, affiliated college leh autonomous college tih te kha kan dan chhungah khan a inziak a. Cluster tur anga kan rukrua a awm lai khan, khawpui chhung collge-te chu cluster pawh a lo tih theih a. Thingtlang, entirnan: kan district khawpui Hahthial te, Champhai te pawh college pakhat a awm a, cluster kha a tih ve ngawt theih dawn lova. Khang ho kha engtianga constituent tur nge ni dawn? Autonomous College angin an kal dawn nge?

Hei, ka bulah Kolasib bialtu MLA zahawm tak, kan Dy. Speaker hian, “Kolasib kha ring takin rawn sawi rawh; Champhai leh Lunglei-in a university hmunpui an inchuh lai khan; Kolasib hi a rem ber zawk a nia” min ti a, ka sawi sak nghal ni se. Chutiang chuan, he kan college hrang hrangte State University-a affiliation kan tih dan tura kha engtiangin nge ruahmanna kan neih dawn, ti kha zawt duh bawk a. Tin, (**Speaker:** Minute 8 a kawka ta a, a zo hnai tawh em?) Pu Speaker, ka zo tep e.

3) Tin, section 7 (sub-section 1) ah khan Online and Distance Learning Course a provide tur thu kha Branch of Learning angin a rawn sawi a. Kha kha eng ang chi nge ni dawn? Tuna a lan dan projected-ah hian zirlai tam zawk neih kan tum bakah cluster of college kan tih lai hian, he House member ngeite pawh hi hrilhfiyah deuh kan ngaihna chu, State University a nih khan, college te pawh kha din deuh sup sup theih tura inngai te pawh kha kan awm a. Kha kha a ni reng em? Vawiina kan college neih mek tihchangtlunna nge? Entirnan: ka bial Darlawn-ah te pawh tunah khian khawtlangin college kan din a; Kawnpui-ah te, Vairengte-ah te pawh khawtlang college din a awm a. Heng angte hi engtin nge kan university kal turah hian min kalpui an tum? Cluster ang te emaw, projected awmze nei zawka kan kal dawn anih chuan an kal dan tur hi kan sawifiah a ngai ang a. Kan sawi tak, Online and Distant Learning Course ang tala degree pe thei tura siam kha a theih ang em?

4) Tin, Section 9 (sub-section 1) ah khan, “kan Chief Minister kha Chancellor a ni ang a, Pro-Chancellor-ah Higher & Technical Education Minister a ni ang” tih a awm a. A tha khawp mai a, ka hnial hauh lo. Amaherawhchu, kan politics leng vel leh education hi kan kaikawp ang a; University zirna hi politics nena inpawlh miah lo tura kan ngaihtuahna tura hi, a ni lo zawngin a kal palh a hlauhawm a. Governor te, State tam takin an hman ang hi

nge tha zawka Chief Minister hman kha, tih kha chu ka hrethiam lo.

Kan ngaihtuah tur chu University thil pawimawh, tul a lo awm ang a, politics-ah tul lovah kan chief minister te, kan higher education minister te kha University-a inrawlh thuk lutuk, ban sei lutukah kan la inpuh ang a, thil tha lo zawk a thleng thei ang em, tih te min ngaihtuah tir a. Tin, section 9 (sub-section 2) ami, pro-chancellor chungchang pawh kha a ni a.

5) Tin, section 31(sub-section 1) ah khan, Transfer or Service of Employees of Cluster College chu Mizoram State University kutah a awm ang” a rawn ti a. Khatah khan zawhna lian tak mai ka nei ta a. A thawktu zawng zawngte kha University hnuai ah an awm tawh dawn a. An service leh engkim kha State University hnuai ah a awm dawn chuan, Higher & Technical Education Directorate hi engtin nge a awm zel dawn, affiliation piah lamah khan?

Tin, chumi piah lamah chuan, section 24 (sub-section 14) – ‘Power to make Stature’ tiha ‘Management of College and Institution’ tih hnuai ah khan ‘State University kutah a awm ang’ a ti vek mai si a. Khatiang a nih chuan, nichina ka zawhna – college-te State University an luh dan kha a thlik-thlawk deuhin, indawtin kal ta se, seniority pawh kha engtin nge a thawktu kha an pek dawn? State sorkar-ah an seniority kha an chhawm dawn nge; State University-a an luh dan seniority kha?

A tawpna atan chuan, Pu Speaker, Section 24 (sub-section 4)-ah khan fimkhur ngai lai ber chu, “University Grant Commission (UGC) regulation ang zelin teacher leh staff appointment te, an hamthatna leh service te a kal ang” tih a awm a. Khatiang khan kal dawn ta se, State University thawktute an service zawng zawng kha Mizoram State University-a a thawh luh dawn chuan, vawiinnia Central University hnuai ah thawktute hian Civic Rights an nei vek a. Chu Civic Rights chu kan college zirtirtu zawng zawng khan an enjoy ve tawh dawn tihna a ni em? Hei hi engmah ziah a awm si lova, vawiinnia University leh Pachhunga University College te’na an neih mek ang hi a vaia la lut tur anga a inziah si khan, kan college zirtirtu zawng zawng hi Civic Right nei tur hian tha kan ti reng em, tih pawh kha ngaihtuah tham a awmin ka hria. Chungte chu kan Minister khan nakin a windup-naah khan min sawi sak se ka duh khawp mai. Pu Speaker, hetiang Mizoram State University Bill kan Minister zahawm takina a rawn put luh hi ka thlawp e. Ka lawm e.

SPEAKER : Kan House Leader-in sawi duh a nei em? Sawi duh a neih chuan, ilo sawm ang.

PU LALDUHOMA, CHIEF MINISTER: Pu Speaker, ka lawm e. Tun hma khan literacy rate-ah hian pakhatna kan ni thin a, tlem lai deuh atang khan pahnihna ah kan tla thla ta a. Tunah hian kan Minister leh a thawhpuite hian pakhatna nih leh tumin theihtawp an chhuah mek a, hma pawh an sawn hlein an inhria a. Member zawng zawngte hemi kawngah hian mahni bial theuhah theihtawp chhuah ta ila. Kan la hniam deuhna area-a kan memberte phei kha chuan theihtawp han chhuah leh zual ula. Chumi kawnga mamawh in neih te chu kan theih ang anga intanpui turin sorkar hi kan inhawng a ni, tih ka sawi hmasa duh a ni.

Tin, kan sawi teuh tawh angin, kum 5 kaltaah National Education Policy hmangin ‘University in neih hi chu research institution angin a kal tawh dawn avangin, a hranpaa University in neih a ngai’ tiin, inbuatsaih nan kum 15 hun min pe a. Tunah hian kum 5 chu

a kal ral der tawh a, tichuan kum 10 dang kan la nei a ni. Sorkar hmasain 2022-ah task force te dinin 2023, July ni 31-ah Council of Cabinet-in thu tihtluk te a lo nei chho a. Tichuan, 2023, August ni 16-ah khan he University kan neih theihna tura a draft bill rawn siamtu turte a lo din tawh a. Chu draft bill kal zela chu keini kan lo sorkar ve, nikum June ni 31-ah khan Council of Ministers-in lo thlirin, “Hei hi chu, tuaimam ngaite an tuaimam lehin, session lo awm turah put luh theih a nih tawh hi maw le,” kan ti ta a ni a. Tichuan, a hmun tur te pawh hi a hmanhmawhthlak tawh si a, engtin nge kan tih ang, tia ngaihtuah chhinna mai mai a awm a. Chuta rilrua lo langah chuan, Govt. Aizawl West College hi khumi Luangmual West-a Pu Ch. Chhunga High School thlang Sericulture ramah khuan dah tum a ni a, a sakna tur sum te pawh tunah hian dah a ni tawh a.

Tichuan, a bul hnaia Geology & Mining rama a building khu rei daih tur a ni tawh lova, thiah a ngai tawh tho tho a, Industry Department-ah hian lawi chho ta mai sela, an khawlian deuh dahna tur te hi ngaihtuah ta ila. Khu khu thiat ila, khutah khuan Mizoram University hi dah ta mai ila, hemi Govt. Aizawl West College pawh hi chu lampang rawn nek lo thei ang ber chuan dah ni ta sela, an intawm theih dan te awm ta se; University pangngai anga Campus zau tak neih ngai tur niin a lang lo bawk a. Chutiang chuan tih mai tur em ni ang, tih te pawh eng emaw chen chu lokal pui tawh a ni a. A hming te chu nakinah kan duh duhin kan la thlak chho thei zel a, a hmun pawh a la ngaihtuah theih zel a.

Kan han inchuh nak nak a, inchuh hranpa em em ngai loin a hmun remchang kan ngaihtuah dawn anih chuan, nakin lawka khawpui mawi tak ni mai tura kan beisei mek Thenzawl saw a rem em em a ni. Tin, kan chhim lam MLA te kha an trangrual tha viau mai a. Lunglei-ah Engineering College kan nei a, a hlu khawp mai a, kan neihchhun a ni tak meuh meuh a. Kum 2019, February ni 3-ah khan India Prime Minister meuh kha kan lo hawntir a ni a. Mahse Pu Speaker, tunah hian water supply bakah power supply te, a approach road te, staff-quarters te pawh a awm lo bawk a. Keipawhin hmanah khan va tlawh ka tum a, ‘I kal thleng thei lo ang’ min ti a ni. Amaherawh chu, operational ni si lo te hian kan rilrua kap khawp mai a. Lunglei-a kan Engineering College hi functional a awm thuai thuai theihna turin sorkar pawhin sum remchang kan ngaihtuah mek a ni. A hawna te a lo rei tawh bawk a, faculty tur engmah la awmlo a ni a. Tin, sen ngai a tam tawh dawn a, kan kuta kan kenkawh tura tih vek a ni bawk si a. Hengte hi kan ngai pawimawh hle a ni.

Tichuan, 2035-ah chuan tuna kan college awm laite tan ‘affiliation min petu tur kan nei tawh dawn lo’, tih kha thil Chiang niin a lang a. Keimahni pual university kan lo neih chuan, a lian deuh, a changtlung deuh kan college zinga mi hi Autonomous Degree Granting College ah, degree pe thei turin kan han dah ve ang a.

SPEAKER : Aw khawngaihin. Kan business hun a lo tawp a. Kan zo law law dawn nge ni ang? (House-in zawh law law a remti a.) Aw le, chhunzawm rawh le.

PU LADUHOMA, CHIEF MINISTER: Tichuan, a college te deuh ho kha chu constituent-ah kan dah ve mai dawn ni awm tak a ni a. Tin, online leh distance courses te awmin, degree leh diploma certificate te an pe thei dawn a, kha kha regular a kal theilote tan pawh a tha hle dawn a ni. Tunah hian University pahnih chauh kan nei a, MZU leh ICFAI te. Hei baka PG zirna kan han neih te chu - NIT te, ZMC te, Central Agriculture University Selesih a awm te hi a ni mai a. A hnuaiyah hian Horticulture College, Thenzawl ah kan nei bawk a. Hei pawh hi kan zir laite hian awareness an nei vak lo emaw ni aw, ka ti a. Admission

hi rin aian a lun lo a. He Horticulture College kan neih hi tangkai tak tur a ni. Tuna sorkar lai policy nen pheih hi chuan a pawimawhna a nasa leh zual turah kan ngai a ni.

Tin, Central Agriculture University kan neih hi hmannah an Vice Chancellor te nen inkawmna kan nei a; a lo changtlung viau leh nghal a. Hetah hian keimahni tualchhung mi eng emaw zat lo lut vein, a tha pawl tak a lo ni nghe nghe a ni. Tunah hian heng University pahniha intake (seat) kan neih hi 1100 vel bawr chauh a ni a. Kum tin hian kan college hrang hrang atang hian graduate mi 4500 bawr vel an rawn chhuak ziah bawk a ni. Chu mite zir zelna tur chu seat 1100 vel chauh kan nei a nih si chuan, zir lai 3400 vel PG zirna tur nei lovin tunah an awm mek tihna a ni a. Chung zinga eng emaw zat chuan State pawnah admission te an hmu ve ngei a, mahse an tam lo a. Chuvang chuan, zirna sang zawk kan mamawhna hi a lian hle mai a. A tichiang emem tu chu, kan GER (Gross Enrollment Ratio) hi han en ila - National percentage 26% hi kan pha lo a, national average hnuaiah kan la awm a ni. A hnuaiah lamah chuan kan ti tha viau a, amaherawhchu, a sang lamah hian kan la tlahniam hle. Hei hi, ‘engvang nge’ kan tih chuan, ‘University tha kan neih tawh loh vang a ni’ tih kha a chiang em em a ni.

Chuvang chuan, vawiina kan bill hi tha ka ti a, ka support a. Chu mi paha kan sawifiah lawk duh chu, Pu Speaker, kan Member thenkhatte khan kan high court te, kan university te hi remna kan neih avanga kan neih ni khan an rawn sawi a. He House kaltlang hian Zoram-mipui hian thudik kan hriat a thain ka ring a. India Constitution, Article 214 kan en chuan, “There shall be a High Court for each State” tih a chuang kulh mai a ni. “There will be” pawh a ti lo, “Shall” a hmang a ni. “State tinin High court hran a nei ang”, a ti sa tawp mai a ni. Hei hi remna leh muanna kan neih hma daiha India Constitution ah hman atanga lo awm tawh kha a ni a.

Tin, State List kan en chuan, Entry 11 ah te, Concurrent List ah te, State-in university a neih theih dan tur a chuag sa a. Amaherawhchu, inbiak lai khan MNF palaite khan remna thuthlungah khan ‘hei hi ziah lan ve kan duh’ an ti a. Home Ministry lam khan, ‘ziahlan a tul hlei nem; State in ni dawn a, in neih theih sa a ni a, State zawng zawngin in neih theih sa a ni a. He lai India Constitution-a chuang sa helaia lo ziah nawn ve leh hi engmah hlawkna a awm lo’ an ti a. Amaherawhchu, kan MNF lam unaute khan, ‘a pawina a awm hlei nem, Constitution-a chuang sa kha kan la chhawng ve dawn a ni mai a, engnge pawh chuang; a hekna a awm hlei nem. Decoration atan pawh kan duh ve a lawm’ an ti a. Tichuan, keini khan kan nawrpui bawk a, chutiang chuan, remna thuthlungah khan rawn ziah luh ve tak mai kha a ni a. ‘Memorandum of Settlement avanga lo nei ta erawh chu kan ni hranpa lo’ tih kha ka han sawifiah pah duh lawk a ni. Tin, a lunglenthlak zawnga kan lak chuan ka pawm tho mai; khang lai hun kha a lungleng thlak ve hrim hrim e. Aw le, Pu Speaker, he Bill hi ka thlawp e.s

SPEAKER : Awle, a lawmawm e. Tunah chuan kan Minister zahawm takin a bill te wind-up a, House pass pui rawn dil turin ilo sawm ang u.

DR. VANLALTHLANA, MINISTER: Pu Speaker, ka lawm e. “The Mizoram State University Bill, 2025” ka put luh min sawipuitu thahnem tak an awm a, a lawmawm khawp mai a. Mi 15 laiin ngun taka an zir thu te, an ngaihdan te, zawhna te tarlangin an rawn sawi a ni a. Midang pawh kha sawi duh an nei hlawmin ka ring a, amaherawhchu hun avangin insum tlang niin ka hria a. Kan phur tlang a, kan trang tlang bawk a, ka lawm takzet a ni.

Pu T. Lalhlimpuia, Lunglei West bialtu rawn sawi kha, he section 41-na hi, Mizoram University hnuaiiah college zirlai awm mekte chu Mizoram State University hnuaiiah hian an kal chhonzawm thei dawn a, automatic in an chhonzawm nghal dawn tihna a ni ber a. Tin, Section 6-na a rawn sawi industry academic linkage chungchang kha keini pawhin kan ngaipawimawh viau a ni. Er. R. Rohmingliana, Thorang Bialtu rawn sawi, a rawn zawhna – ‘State University din leh NEP-2020 hi a inrem vek em’ tih kha - a inrem vek e a ni. Tin, ‘RIPANS te, ZMC te hi engtingge a kal zel ang’ tih kha, RIPANS hi chu Central ta a nih avangin kan va sawi sak thei lo a, ZMC erawh chu State hnuaiia awm a ni a, kan lak ngei te pawh a ngaiin ka ring a. Central lampang an zawm duh zawk a nih pawhin kha chu ngaihtuah chhoh a ni ang.

Tin, Directorate chungchang, kan Leader of Opposition leh Pu Rohminga rawn sawi kha - Directorate hi tunah hian State University nei ho Assam te, Tripura te hian an la nei tho a, buaipui tur tam tak a la awm a. Amaherawhchu, NEP kal zelah nakinah a tul ang em, tih chu ngaihtuahna sen chu a ngai a. Tun dinhmuna erawh chuan directorate hi chu kan la mamawh a ni. Maharashtra te pawh State University tam tak nei an ni a, chutiang chuan directorate neiin an la kal mek a ni.

Tin, ‘PM-USHA atangin sum kan la dawng thei ang em’ tih kha - kan la dawng thei dawn a. Tunah hian a tlangpuiin crore 100 chu an dawng a. Amaherawhchu, kum 2026 (nakum) March ah hian PM-USHA hi a tawp dawn a. Tun dinhmuna kan dil theih hi chu crore 20 vel chauh a ni tawh a, kan tlai hret a. Chu chu kan han hmanhmawh em emna chhan pakhat pawh chu a ni. Amaherawhchu, Finance Commission thar te kan han nei ang a, chungah chuan chhonzawm chhoh te pawh a la nih kan beisei a. Chutiang chuan, a tam zawk hi hmuh theih kan in beisei a ni.

Tin, CM chungchang kha Opp. Leader bakah midang pawhin an rawn sawiin a. Ni e, hei Sarkaria Commission in Governor chungchang hi 1980 khan a ngaihtuah a. ‘Governor te hi engtia tih tur nge’ tiin. Tin, MM Punchhi Commission, (hei hi a hnai ber a ni a) in 2010 ah report a pe a. ‘Governor te hi constitutional duty bakah hi chuan inhmang lo se’ tiin recommendation a pe a ni. Tin Governor te he University Chancellor-a an hman thin hi hmanlai British hunlaia ‘colonial root’ kan tih atanga kan chhawm chhoh a ni a. Tunlaiah chuan khang atanga inhnuhdawh tana, khatiang kha a tul tawh lo e, kan ti tan te a ni ta bawk a. ‘midang pawhin an rawn tih tho hmel a’ tiin, chutiang chuan ngaihtuahna te kan seng a. Tin, ‘a va political awm ve’ tih kha zawhna a awm a. Kan Governor tunhnaia mite phei chu han ngaihtuah ula, party pakhata inhmang chho char char te an rawn dah ve tho a ni; kha kha political appointment tho a ni. Chuvang chuan, a political lohna kha awm bik chuang lo a. Fimkhur takin kan Chancellor-te, Pro-Chancellor te pawh an kal kan ring a. Tunah sorkarna kan chan avanga tih deuh buaih tur emaw kha, a dang an lo awm zel dawn a, sorkar reng tur a ni bik lo a. Chungah chuan state inrelbawlnaah te ‘a remchang zawk ang e’ tiin kan dah a ni.

Tin, Er. H. Ginzalala, Champhai North bialtu zahawmtakin a rawn sawi ang khan ‘Zo-University’ tia a hming thlak mai kha a rawn rawt a. Nia, a hming chungchang pawh hi nakinah kan la ngaihtuah ang a. A bill hi neih phawt kan duh a, a hming hi chu inrawn zau te pawh kan la duh ang a. A chhan chu ‘Mizoram University’ tih leh ‘Mizoram State University’ tih te hi a lo inhnaih riau a, inrawn zau kan duh a. Chuvangin, ngaihtuah that leh te pawh chu a ngai mai thei a. Kan put luh rawih a ngai tawh si a.

Prof. Lalnilawma, Tawi Bialtu zahawmtakin ‘internationalization’ chungchang a rawn ngaipawimawh a. He thilah hian Mizoram University tan a kan kal a, thil kan la sawi lutuk pawh hi a tam loin ka ring a. ‘Central University’ a ni a, ‘State University’ a nih tawh erawh chuan Minister leh MLA te pawh kan teichhuahna ah pawh State University tan kan va sawi thei zawk pawhin ka ring a. Tichuan, direct takin, kan kalna apiangah hma te kan la leh zual theiin kan ring a. International, India ram pawna University-te nena inkungkaihna tha te pawh nei thei turin hma kan lak chhoh zel pawh ka beisei tlat a ni. Tichuan, Er. H. Lalzirliana, Mamit Bialtu zahawmtakin Chancellor chungchang a rawn sawi kha ka chhang nghal ni mai se la.

Tichuan, Dr. K. Beichhua, Saiha Bialtu zahawmtak rawn zawhna kha - Vice Principal chungchang hi UGC regulation ah hian a awm loh avangin, dah a ni lo a. Vice Principal te hi daha, a hrana office te siamsak a nih pawhin, chutiangan hlawh a hranin a awm tawh lem chuang lo a. Chuvang chuan, a bill ah hian dah a ni lo a. Tin, zirtirtu chungchanga Civic Rights kha Opp. Leader khan a rawn sawi a. Civic Rights hi chu tunah rih hi chuan kan la dah tel lo a. Nakinah ordinance te, regulation te a la awm ang a, khatah khan kan duh leh duh loh tur te chu a la lang ang a. Amaherawhchu, (ka hresual a nih loh chuan) State University ah hian an dah ngai lem lo; Central University ah chauh an dah a ni. Tin, Section 26 (clause 10)-a tihsual kha chu gazette ah tih dik a ni ang.

Pu C. Ngunlianchunga, Lawngtlai West Bialtu zahawmtakin a rawn sawi – ‘Lunglei dah theih ni se la’ a rawn ti a, a awm kan ti khawp mai a. Amaherawhchu, University din tur hian college 5 neih a ngai a. State sorkarin a pawh khawm theih turin college lian a ngai bawk si a. Lunglei ah college 2 kan nei a. Chutih aliin Aizawl ah chuan 5 bawr kha kan nei bawk si a. Remchan zawkna avangin tihian kan ti chho ta ni. Nichin ka sawi hawna ah khan ka lo sawi tel chiah lo a, school 5 kan mamawh a, chuvang chuan Aizawl ah hian loh theihlohin kan tih a ngai dawn a ni. Amaherawhchu, nakinah school kan nei belh duh te a nih chuan, hmundanga dah dan hi chu ngaihtuah ni se, tih pawh keimahni ho ah kan sawiho tawh a. Chu chu hun kal zel tur atan ruahmanna kan dah a ni.

Tichuan, kan Opp. Leader zahawmtak Pu Lalchhandama Ralte rawn sawi ho - Section 3 (clause 3) - bank balance chungchang kha, Pachhunga University College hi NEHU hnuaia awm thin a ni a, Mizoram University-in a lak khan a thil neih ang ang account-a awm kha MZU ta a ni nghal a, chutiang deuh chiah chu a ni dawn a. College ho hi State University hnuaiah constituent college an nih dawn chuan, University ta a nih tawh dawn avangin, University account ah a lut ve ang a. Amaherawhchu, anni khan a remchan dan angin an lo hmang thei zel dawn a ni.

Constituent College tihah khan, Govt. College zawng zawng hi constituent college an nih a ngai tawh dawn a. Tichuan, college tha zual kha chu Autonomous College an ni ang a, anmahniin degree an pe ve ang a, chu chu University in a lo nemnghet ang. Chutiang chuan a kal dawn a ni. ‘Eng hi nge autonomous college ni dawn’ tih chuan, constituent college hi chu college lian vak lo hote kha an ni dawn a ni.

Tin section 7 (clause 1) hnuaiah ‘Online & Distance Learning’ tih kha a lo awm a. ‘Online’ tih hian, tunah chuan Massive Open Online Courses (MOOC) hi University zawng zawngin an nei vek a, nasa taka kalpui turin sorkar laipui hian tunah hian a nawr mek a, Mizoram University pawh hi a rawn nawr na khawp mai a. Chutiang te pawh chu kan tih

ngei ngei a ngai dawn. Online te, distance learning atang hian diploma certificate te kan pe thei dawn a. Chu chu University ken tel tura an rawn dah tawp a ni a. Hei hi kan kalpui ngei ngei a ngai dawn a ni.

Tin, khawtlang din college chungchang zawhna kha – NEP-2020 hian higher education institution (college a ni ber ang chu), heng ho hi 2023 ah chuan ‘multi-disciplinary an ni vek tawh tur a ni’ tih a ni. Multi-Disciplinary awmzia chu, Arts chauh kha a awm thei tawh lo; Commerce bakah hian B. Ed course te an kalpui a ngai a. Tin, kum 4 a ni tawh dawn a. ‘BA’ kan tih mai, graduate ho hi kum 4 course-a a kal chhoh a ngai tawh dawn a. A kumkhatnaah certificate, a kum hnihnaah tikhan a kal chho zel dawn a, diploma degree tih te; khatiang khan a kal chho zel ang a. Chuvang chuan, vantlangin lo dina lo buaipui hi nakinah chuan a harsa dawn tih hi sawi a ngaiin ka hria a. Thenkhatin kan tute, kan fate hmundang hla taka kaltira sum tamtak senga lehkha an zirtir hi kan khawngaih a, kan manganpui a. College kan din hi chu ‘a awm’ tihna chin hi chu kan nei a. Amaherawhchu, sorkar laipuiin hetiang hian ruahmanna a rawn nei a. A kal zel a nih, chuan multidisciplinary college kan din a ngai dawn a ni. Tunah hian Zawlnuam College-ah zirlai 56 kan nei a, Khawzawl College-ah 75; chungte pawh chu a ngaihtuahawm ru viau a. Amaherawhchu, theih tawpin thuamthata, bawhzui te pawh kan tum dawn a. Vantlangin a hranpaa an lo buatsaih kha a harsa zual dawn a ni.

Duh tawh hnai dawn mai ila, Pu Speaker. Tikhan ka chhang kim em, zawhna ho kha?

PU LALCHHANDAMA RALTE, OPP. LEADER: Pu Speaker, a lo chhinchhiah tha viau a. Ka sawi duh chu – ‘affiliated college tur kha hetia university kan neih hian an lut mai dawn nge, a tahtawlin’ tih kha. 2035 thleng chance kan nei a, college-ho khan. ‘Keini chuan Mizoram University kan la zawm duh zawk e’ tih awm ta se, kha kha engtin nge sorkarin kalpui a tum? Tin, ‘an service seniority chhiarna atan khan, State-a an luh kha nge tuna directorate hnuaiah an service kha an chhawm dawn em’ tih kha ka zawhna pakhat kha a ni bawh.

DR. VANLALTHLANA, MINISTER: A lawmawm e. State-ina college a neih bik ho kha constituent college a ni vek dawn a, University kan neih atangin. An duh emaw, duh lo emaw, State-in a lak a ngai dawn a ni. Mizoram University hnuaiah an awm tawh dawn lova. Tin, private college-te kan la nei a, chungho chu affiliated college an ni thung ang. Chutiang chuan kalpui a ni dawn a.

Service chungchang erawh kha chu (sawiloh theih loh) - Pachhunga University College kha NEHU atangin MZU-ah indinthar a, chungah chuan an service seniority kha an chhawm vek a ni. Chumi a nih avang chuan, university a lo indin a nih chuan, an chhawm vek phawt ang a. Amaherawhchu, nakin hun kal zelah tuna UGC dan kan nei a nih chuan, kan chhunzawm zel ang a. Chutah chuan, University te a lo indin fel tawha service te an lo tihfel vek tawh chuan leh, college atanga university an dil kha chuan, a tlangpuiin an service an chhawm thei tawh lo. Entirnan: Pachhunga University atangin Mizoram University-ah an zuk dil khan an service kha an chhawm lo a, junior-ah an luh lnghal a ngai; chu chu an kalphung a ni. Ngaihtuahna thui tak sen a ngai a, hemi chungchangah hian. Amaherawhchu, transition period-ah chuan khatiang inhlanhawn thil kha chu, service hi chu an chhawm thin a. Chu chu ka hriatdan a ni a. Amaherawhchu, Associate Professor atanga Professor te an dil a nih

chuan, an luh tanna ang kha an hmang zel dawn a ni.

Pu Speaker, Sawi tur tam tak a awm naa, ka duhtawh hnai dawn ang a. Ka tarlan tel duh chu - Mizoram University din tirh a nih khuan 2001-ah a awm tan a, 2002-ah class an tan a. Pu Chhanzova te nen hian batch hmasa zingah kan tel a, Commerce batch hmasaberah khan kan awm ve a. Kan han zirchhuak a, result a chhuah hmain university computerization ti turin min ruai a. A dintirh tea hretute zinga mi ka ni vein ka hria. Hei, kum 20 a pel chho tawh a. A tir khan department 5 chauhin an tan a. Chutah chuan kan building, kan class kalna a bang te kha kan kheuh khawh thei ti-tih a. University dintirh a nih khan Chaltlang-ah class kan kal a, a then Chanmari-ah, a then University-ah te khuan an lo awm lailawh bawh a; thla 6 hnuah kan zuk zawmthla veleh a. Tiang chuan kan han kal a. University kan din dawn hian State sorkar hian ti puak nghal durh emaw, ti par nghal chuai tur khan beisei lo ila. Tunah hian Mizoram University hi India rama University tha pawl Top 50-ah te a rawn kaichho thei ta hial a. Chutiang chuan, theihtawp chhuah ila, kan ram tan, he State la luah zel turte tan hian theihtawp kan chhuah chuan, he State University pawh hi nakin ah chhen-fakawm takah kan la chhuah theih pawh ka beisei a ni.

Mizoram State University kan din dawnah chuan (han ti chho ta ila,) college hi Mizoram ah 34 a awm a, a taka kalpui 32 a awm bawh a, chutah chuan zirlai 14,500 chuang kan awm a, chung ho chu State University hnuai hian an luh te a ngai tawh dawn a ni a. Hmabak a ko khawp mai a, tih tur tam tak a awm a. Exam buaipui te, syllabus duan te a ngai dawn a; rawtna tam tak kan dawn te pawh a ngai ang a, kan inrawn khawm tam te pawh a ngai ang a. Chungah chuan Zoram-mipuite, a bik takin helaia roreltute ho phei chu rawtna tangkai tak tak hman theih tur rawn theh luta, tangkai taka inpuitawnin, chutianga hma la zel turin kan inngen a ni.

Chutichuan, Pu Speaker, “The Mizoram State University Bill, 2025” hi min pawm saka min pass pui ngei turin ka ngen leh che u a ni. Ka lawm e.

(Speech not corrected.)

SPEAKER : Aw le, kan Minister zahawm takin, “The Mizoram State University Bill, 2025” chu House ah pass pui turin a rawn dil a, kan buk ang a. Remti apiangin ‘Remti’ ti ula, remti lo kan awm chuan, ‘Remti lo’ ti ula.

(House-in pass a remti a.)

Aw le, “The Mizoram State University Bill, 2025” chu he House hian lungruak takin a pass ta a ni. (**Dr. Vanlalhlana, Minister:** Pu Speaker, ka lawm e.)

Tunah chuan kan bill pahnhna - “The Mizoram Exhibition on Films on Television Screen through Video Cassettes Players Repeal Bill, 2025” tih a ni a, hei hi a bill neitu, Dr. Vanlalhlana, Minister zahawm takin House ah introduce phalna rawn dil turin ilo sawm ang u.

DR. VANLALHLANA, MINISTER: Pu Speaker, I phalna leh he House zahawmtak phalnain, “The Mizoram Exhibition on Films on Television Screen through Video Cassettes Players Repeal Bill, 2025” hi introduce ka rawn dil e.

SPEAKER : Aw le, bill neitu Minister zahawmtakin House-ah introduce

phalna a rawn dil a, kan phalsak em? (House-in a phalsak a.) Aw le, kan phalsak chuan, tunah introduce-in, sawiho turin rawn move nghal bawk sela; ilo sawm ang u.

DR. VANLALTHLANA, MINISTER: Pu Speaker, i phalna leh he House zahawm tak remtihna in “The Mizoram Exhibition on Films on Television Screen through Video Cassettes Players Repeal Bill, 2025” hi he House zahawm takah hian ka rawn introduce a, in phalnain ka han move chhonzawm nghal ang a.

He bill hi sawi thui pawh a ngai lo. Tunlai angah chuan he Act hi hman theih pawh a ni tawh lo a. Video cassette player hmanga tv kaltlanga film te chhuah thin hman lai kha chuan a ni thin a, tunah chuan tih a ni tawh lo a. India ramah central sorkar hian hetiang a dan hmantlak tawh loh hi a tam thei ang ber tibo (repeal) tura ngenna te kan tawng a. Chutiang a nih avang chuan, he Bill hi, he Act kan neih sa tibo tura Bill rawn lut a ni a, memberte'n a min lo pawmpuia, min lo pass pui turin ka rawn ngen e.

(Speech not corrected.)

SPEAKER : Awle, kha kan Minister in a bill rawn putluh a nih chhan te a rawn sawi a, Dan hman tawh loh te hi repeal (nuaibo) loh chuan, hnawk mai mai te pawh a chang thei reng a. Kha kan Minister khan a sawifiah viau mai a. Sawiho tul kan ti em?

PU LALCHHANDAMA RALTE, OPP. LEADER: Pu Speaker, i veilam atang hian, ‘nangmah ding mai rawh’, min ti a, an hmanhmawh tawh hlawm deuh nge ni, ka hre lova. Tawitein sawi kan tum ang a.

Bill meuh a ni si a, sawipui loh kha chu a rem lova, House zahawmna atan kan Minister zahawm tak khan tawitein a rawn sawifiah a. Kum 35 kal ta ah khan keini 9th Legislative Assembly kan ni a, khatih lai 2nd Legislative Assembly tena ni 21st March, 1990 an pass kha a ni a. A lunglenthlak a, tawitein, kan repeal dawn avangin han sawi lawk duh a.

Khatih laia kan Assembly Speaker kha Pu Hiphei a ni a. He Dan puluttu, a minister in-charge kha kan Chief Minister hun rei tak lo ni tawh, Pu Lalthanhawla kha a ni. Chutah chuan, kan House record kan thlir a, chuta lo participate-a thusawitute chu - Pu J. Thanghuama te, Pu PC Zoramsangliana te chatuan ram an pan ta a, la dam zingah chuan Pu Hawla, Dr. Thangtea leh Pu H. Rammawi te an ni a, Kan senior-te Dan siam, a hun laia tha tak, video cassette leh VCR kan tih ang chite hawh theih dan te control act awm an han siama kha, vawiinniah chuan ‘digital world’ ah kan awm tawh avanga repeal a han ngaih takah hian, he House-a lo awm thin kan senior-te hming han lam chhuah hram hi ka duh a ni. Keini pawhin repeal hi kan thlawp e, Pu Speaker.

SPEAKER : A lawmawm e. Sawi duh dang kan awm em? Aw, kan House Leader ilo sawm ang.

PU LALDUHOMA, CHIEF MINISTER: Pu Speaker, middle school kan kal lai chuan Khawzawl ah, radio nei hi pahnih an awm a, chumi ngaithla tur chuan buhfai no khat kan chawi thin a. A hnuah tape recorder te a rawn chhuak a, kan lawm em em a, cassettes te. Tunah chuan thil obsolete a lo ni ta. Khawvel hmasawn zia min hrilhin ka hria, vawiina kan bill hian. Thil tul tawh lo a ni a; rem kan titlang a nih chuan, pass mai ka rawt e.

SPEAKER : Awle, tunah chuan kan Minister zahawm tak, a bill windup-in, House pass-pui tura rawn dil turin ilo sawm ang.

DR. VANLALTHLANA, MINISTER: Pu Speaker, ka lawm e. A Principle Act kha, (ka hmanhmawh deuh nge ni), ka ziaak tho a, a lang lo a. “The Mizoram Exhibition of Films on Television Screen through Video Cassette Players Act, 1990” tihbona tur kha a ni a. Nichina kan Opp. Leader leh kan House Leader zahawm takten an sawi ang khan, khawvel thang zel leh thiamna pung zel avangin hman hleihtheih a ni tawh lova. Chuvang chuan, tihtawp/tihbo tura tih hi he House-ina min pawmpuia, min pass sak turin ka rawn dil e.

(Speech not corrected.)

SPEAKER : Kan Minister zahawm takin, “The Mizoram Exhibition of Films on Television Screen through Video Cassette Players (Repeal) Bill, 2025” chu House pass pui turin a rawn dil a. Tunah kan buk ang a.

Remti apiangin, ‘remti’ ti ula; remti lo kan awm chuan, ‘remti lo’ ti ula. (House-in pass a remti a.) Aw le, a lawmawm e.

Aw le, “The Mizoram Exhibition of Films on Television Screen through Video Cassette Players (Repeal) Bill, 2025” chu he House hian lungrual takin a pass ta a ni. (**Dr. Vanlalhlana, Minister:** Pu Speaker, ka lawm e.)

Aw le, vawiina kan business chu kan zo ta a. Naktuk March, Ni 5 (Nilaini) chawhma dar 10:30 AM ah kan chhonzawm leh dawn nia.

Sitting is adjourned. (4:33 PM)